

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-00111-2019
Broj akta: 01EN-001
Gračanica, 14.1.2019.. godine

Z A P I S N I K
SA 23. SJEDNICE OPĆINSKOG VIJEĆA GRAČANICA

Održane dana 31. 10. 2018. godine u sali za sjednice nove zgrade Općine Gračanica sa početkom u 10,00 sati.

Početu sjednice prisustvovalo je 29 članova Općinskog vijeća Gračanica.

Odsutan je bio Puškar Hasan.

Sjednicu je vodio i istom predsjedavao Nihad Krajinović, Predsjedavajući Vijeća, zajedno sa zamjenikom Almedinom Devedžićem i sekretarom Dženanom Tukulj.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i gosti: Općinski načelnik, Općinski pravobranilac, šefovi Službi za upravu, član Etičke komisije Mersiha Jogunčić, predstavnik OSCE-a Dragica Karadžin, te predstavnici sredstava informisanja.

Zapisnik sa 22. Sjednice Općinskog vijeća Gračanica usvojen je jednoglasno sa 29 glasova "ZA".

Nova pitanja i inicijative kandidovali su sljedeći vijećnici:

Mirela Trepanić:

“Ja imam jednu inicijativu i vijećničko pitanje.

Prvo ću inicijativu:

Da se osnuje Gradsko amatersko pozorište.

Obrazloženje:

S obzirom da Gračanica teži da bude grad, te s obzirom da je dramska grupa KUD-a Adem Alić dosegla svoje maksimume, osnivanjem Pozorišta odgovorilo bi se kulturnim potrebama stanovnika Gračanice.

Organizovale bi se škole glume, te producirale i izvodile predstave sa amaterima glumcima. Organizovala bi se gostovanja drugih pozorišnih grupa. Korist od osnivanja pozorišta imala bi djeca i mladi, te odrasli zaljubljenici u pozorište. Predstave Skidajte se do kraja, We Will Rock You, Maratonci trče počasni krug i Dženo Dženo Romanipe u Gračanici je pogledalo 6000 gledalaca, što je izvanredan broj. Nagrade na festivalima su kruna proteklog rada: Bugojno, Trebinje, Hrvatska...

Smatram da je Gračanica pokazala da ima sluha za pozorišnu umjetnost, te da osnivanje Pozorišta je sljedeći korak za vrijedne glumce dramske grupe KUD-a Adem Alić.

Stoga predlažem načelniku i vijećnicima da budu osnivači Gradskog amaterskog pozorišta Gračanica. Publika i glumci u Gračanici to zaslužuju. Nema grada bez kulture.

Vijećničko pitanje glasi:

Šta se dešava sa Dječijim igralištem u centru? Zašto nije predato na upravljanje preduzeću Komus kao što je rečeno u maju 2016.godine na vijećničku inicijativu Mirsada Čamdžića. Igralište je stradalo od vremena, dotrajalo te fizički uništeno... Ovo igralište opasno je za igru. Možemo li ga privremeno zatvoriti dok se ne obnovi?

Igralište je uvijek puno djece što govori da imamo potrebu za igralištem, ne samo ovom mjestu te u narednom periodu treba istražiti gdje još možemo postaviti slično igralište za djecu, te i to sprovesti u djelo.

Hadžić Nejra:

“Ja za danas imam jednu vijećničku inicijativu. Predmet je ponovna inicijativa za izgradnju, odnosno završetak, trotoara pored magistralnog puta M-4 u naseljenom mjestu Stjepan Polje.

Inicijativa od 28. 02. 2018.godine:

Poštovani,

Obzirom da do sada nisam dobila nikakav odgovor povodom inicijative od 28. 02. 2018.godine, u cilju zaštite učenika kao jedne od najugroženijih kategorija učesnika u saobraćaju, kao i drugih mještana Stjepan Polja, te evidentne činjenice svakodnevnog povećanja frekvencije drumskog saobraćaja ponovno pokrećem inicijativu za završetak trotoara pored magistralnog puta M4, na relaciji naselje Luke - ugostiteljski objekat “Šanga” (sa lijeve strane posmatrano iz smjera Doboja prema Gračanici) i relaciji objekat Benzinske pumpe “Trgovir” do izlaza iz Stjepan Polja naselje Bare (takođe sa lijeve strane posmatrano iz smjera Doboja prema Gračanici).

Obrazloženje:

Trotoar pored magistralnog puta M-4 Doboja-Tuzla, kroz naseljeno mjesto Stjepan Polje, opština Gračanica, na relaciji objekat Benzinske pumpe “Trgovir” naselje Luke izgrađen je u toku 2010.godine. U prethodnom periodu bilo je određenih naznaka da se nastavi izgradnja istog cijelim tokom kroz naseljeno mjesto Stjepan Polje, ali to do danas nije urađeno. Obzirom da smo svjedoci svakodnevnog povećanja frekvencije drumskog saobraćaja, što je naročito izraženo na magistralnom putu M-4, posebno kroz naseljeno mjesto Stjepan Polje, u cilju dovršetka navedenog projekta i zaštite svih kategorija pješaka, a naročito učenika (koji svakodnevno koriste navedenu dionicu kako bi stigli do Osnovne škole u Stjepan Polju), pokrećem inicijativu za završetak trotoara na gore navedenim relacijama magistralnog puta M-4. Inicijativa je upućena JP “Ceste Federacije BiH”.

Džebo Senahid:

“Ja za danas imam jednu inicijativu, a vezano je za sanaciju klizišta u naselju Jahići:

Upućujem vijećničku inicijativu nadležnoj opštinskoj službi za realizaciju projekta sanacija klizišta u naselju Jahići MZ Stjepan Polje i opštinskom načelniku da se navedenom klizištu uradi rigola za skupljanje dubinskih voda i odvodnja istih na primjerenu lokaciju.

Obrazloženje:

Ovih dana završena je sanacija klizišta u naselju Jahići MZ Stjepan Polje nastalog elementarnim nepogodama u 2014.godini. Međutim, od dana uređenja klizišta pojavljuju se vode koje prolaze kroz sanirani dio puta i razlivaju se neposredno odmah ispod navedene dionice po zemljištu koje je nestabilno godinama i jedan je od uzroka nastajanja klizišta na putu.

Kako bi spriječili ponovo klizanje tla neposredno ispod sanirane dionice puta koje bi moglo dovesti do ponovnog kidanja putne dionice i ugroziti naselja iznad klizišta predlažemo nadležnoj opštinskoj službi da izađe na teren, uvjeri se navedene činjenice i razmotri prijedlog izgradnje rigole koja bi sakupljala vode iz navedenog objekta te na adekvatan način izvrši

odvodnja iz nestabilnog zemljišta. Na ovaj način bi pokazali odgovornost prema uložnim sredstvima i sačuvali već završene projekte”.

Demir Milkić:

“Ja za danas imam vijećničku inicijativu i jedno vijećničko pitanje.

Vijećnička inicijativa glasi:

Pokrećem inicijativu da se napravi projektno rješenje i projektna dokumentacija za izgradnju dječijeg igrališta u naselju Čiriš, kako bi se mogao uvrstiti u Budžet 2019.godine.

Obrazloženje:

Inicijativa od mještana naselja Čiriš. Ovih dana sam pozvan na sastanak koji su napravili građani Čiriša. S obzirom da je vrijeme predlaganje projekata za 2019.godinu, Čirišani žele aktivno učestvovati u ovom Budžetu. Njihov projekat je izgradnja dječijeg igrališta u ovom naselju. Žele kutak za svoju malu raju kako bi ih sklonili sa lokalne ceste. Ovaj projekat se nalazi u PKI 2020, a postoji i adekvatno zemljište na kojem je već do sad rađena neka priprema tipa drenaže i slično. Građani nisu zahtjevni u razgovoru su rekli da to ne mora biti ni asfaltirano može i neka druga podloga (beton) samo da se ovaj projekat nađe u budžetu za narednu godinu.

Vijećničko pitanje glasi:

Zanima me kakvi su problemi nastali prilikom realizacije projekta Street Workout Park na suterenu rukometnog igrališta?

Rokovi su prošli.

Prva faza projekta je davno urađena, a poznato je da je i načelnik našao način i uplatio novac za ostatak projekta što je falio.

Da li je do izvođača i kad će biti projekat realiziran do kraja?

Ova tema zadnjih dana se provlači po medijima i društvenim mrežama pa me najviše zbog javnosti zanima odgovor na ovo pitanje, nadam se da ima i adekvatan odgovor”.

Šakušić Ahmet:

“Ja za danas imam jednu vijećničku inicijativu:

U ime građana u ulici Golaći b.b. u mjestu Turalijevac MZ Malešići, upućujem inicijativu Općinskom načelniku da odobri pomoć u novcu, građevinskom materijalu i drugim sredstvima za sanaciju kanalizacije.

Obrazloženje:

Već duži period kanalizacija se izliva preko cijele ulice i parcele koja se nalazi neposredno uz ulicu i na taj način predstavlja veliki problem za lokalno stanovništvo u toj ulici tokom cijele godine, jer predstavlja otvoreni izvor zaraze i nečistoće. Otvoreni izvor kanalizacije mogao bi se riješiti tako što bi se kanalizacija pokupila i odvela do obližnjeg šahta za kanalizaciju. Građani su spremni učestvovati u realizaciji ovog projekta i mole Općinskog načelnika da se u što kraćem roku krene u rješavanje problema”.

Mirsad Čamdžić:

“Imam vijećničku inicijativu, da se izađe u susret stanovnicima Lendića, vlasnicima 15 kuća i obezbijedi pitka voda u domaćinstvu. Naime, iz ove MZ stanovnici 15 kuća vlasnici su prije petnaest mjeseci podnijeli zahtjev za obezbjeđenje pitkom vodom. Oni su vlasnici porodičnih stambenih zgrada u Lendićima, a prilikom izgradnje ovih objekata uplatili su naknadu za uređenje građevinskog zemljišta što obuhvata priključak i napajanje pitkom vodom “Vodovod i kanalizacija” i pored naših pojedinačnih traženja u više navrata da nam obezbijedi priključak i snabdijevanje pitkom vodom su to odbili. Takođe, neki od nas su se obraćali sa zahtjevom i Općinskom načelniku tražeći od njega pomoć s obzirom da se radi o javnom preduzeću u kojem je suvlasnik i Općina Gračanica, da obezbijedi snabdijevanje vodom. Ovim putem tražimo da se u što kraćem roku obezbijedi da se naši stambeni objekti

priključe na gradsku vodovodnu mrežu kojom bi upravljao Vodovod i kanalizacija i da nam obezbijedi snabdijevanje vodom. Smatramo da nije potrebno da objašnjavamo, šta znači nemanje pitke vode u stambenom objektu jer to može biti između ostalog i izvor zaraze. Ne postoji ni jedan opravdan razlog, a pogotovo zakonit da se uskrati snabdijevanje pitkom vodom. Očekujemo da će svi organi kojima se obraćamo u okviru svoje nadležnosti preduzeti odgovarajuće mjere i da se problem riješi. Ovo su podnijeli stanovnici s potpisom 15.8.2017.godine i do sada u tim kućama nema pitke vode i ja evo iznosim ovaj njihov zahtjev na ovaj način, javno i naravno sugerišem da ova tema uđe i u nacrt budžeta za 2019.godinu. Imam jedno kratko vijećničko pitanje. Zašto nema rasvjete u ulici Mustafe Rešidbegovića? Prema pritužbama stanovnika iz ove ulice, rasvjete tamo više nema nego što ima”.

Edin Ibrišević:

“Za današnju sjednicu ja imam jedno vijećničko pitanje:

Pitanje upućujem Ministarstvu finansija TK, da li je Budžetom TK u 2018.godini planirana grant sredstva za izgradnju puta Grič “Polje” u Stjepan Polju općina Gračanica?

Obrazloženje:

Mi smo u Budžetu Općine za 2018.godinu imali gore navedenu budžetsku stavku, takođe iz vijećničkih materijala vidimo da se ova budžetska stavka planira i u narednom budžetu. Smatram da ukoliko nije predviđen grant višeg nivoa, ovu budžetsku stavku treba preformulisati”.

Ibrišević Alen:

“Za današnju sjednicu ja imam dvije vijećničke inicijative i jedno vijećničko pitanje.

Prvo inicijativa.

Zamoljen sam od građana MZ Stjepan Polje da pročitam dopis:

Poštovani Načelnice, uvaženi vijećnici Općine Gračanica,

Ovim putem se obraćamo vezano za rekonstrukciju puta u Mjesnoj zajednici Stjepan Polje-Lanište. U budžetu 2016.godine, budžetska sredstva, grantovi, Općina Gračanica je uvrstila 35.000 KM za rekonstrukciju puta u Mjesnoj zajednici Stjepan Polje-Lanište. 24.05.2016.godine zahtjev za sazivanje ZBOR-a građana uputili su građani koji žive na potezu puta Magistralni put M4-Lanište, za održavanje zbora građana, kako bi mogli formirati građevinski odbor i pristupiti prikupljanju nedostatnih sredstava za rekonstrukciju navedenog puta. Po predmjeru i predračunu radova za izgradnju puta u Mjesnoj zajednici Stjepan Polje izvršena je podjela u dvije dionice, dionicu I (jedan), (Put M4 Doboj-Tuzla, Grič), dužina dionice L=520,00 m i širina asfalta 3,50 m i dionicu II (dva) (Put Grič-Lanište) dužina dionice L= 440,00 m i širine 3,50 m. Poslije prikupljenih i uplaćenih sredstava na račun Općine, 13.500,00 KM što je iznos učešća građana za izgradnju puta dionica I (Put M4 (Doboj-Tuzla) Grič) dužine dionice L=520,00 m, širine asfalta 3,50 m, ukupnog iznosa sa uračunatim PDV-om od 65.158,41 KM odgovara iznos uplaćen 13.500 KM za učešće građana u izgradnji dionice pomenutog puta. Općina Gračanica dana 29.08.2016.godine u 15,20 h objavljuje obavještenje o nabavci br. 720-7-3-73-3-57/16, naziv predmetnog ugovora je “Izvođenje radova na sanaciji dionice puta M4-Grič, Mjesna zajednica Stjepan Polje”. Pomenuto obavještenje o nabavci je objavljeno za dionicu I (jedan) (Put M4 (Doboj-Tuzla) Grič), dužina dionice L=520,00 m i širina asfalta 3,50 m, ukupnog iznosa po predmjeru i predračunu radova sa uračunatim PDV-om 65.158,41 KM. Procedura o javnoj nabavci je okončana u 2016.godini i potpisan je ugovor sa najpovoljnijim izvođačem, s tim što radovi po pomenutoj nabavci nisu izvršeni u 2016.godini.

Općina Gračanica u 2017.godini pristupa rekonstrukciji izgradnje puta u Mjesnoj zajednici Stjepan Polje, umjesto dionice I (jedan) (Put M4 (Doboj-Tuzla) Grič), dužina dionice L=520,00 m i širina asfalta 3,50 m, ukupnog iznosa po predmjeru i predračunu radova sa uračunatim PDV-om 65.158,41 KM, vrši rekonstrukciju izgradnje dionice II (dva) (Put

Grič-Lanište) dužina dionice L=440,00 m i širine 3,50 m, ukupnog iznosa po predmjeru i predračunu radova sa uračunatim PDV-om 100.896,70 KM.

Za dionicu II (dva) (put Grič-Lanište) dužina dionice L=440,00 m i širine 3,50 m, nisu bila planirana sredstva u budžetu Općine Gračanica, niti su prikupljena i uplaćena sredstva za pomenutu dionicu, niti je raspisan javni poziv, obavještenje o nabavci, za pomenutu dionicu, a Općina Gračanica je izvršila rekonstrukciju pomenutog puta, što je za pohvalu, međutim ne možemo da prihvatimo da za dionicu I (jedan) (Put M4 (Doboj-Tuzla) Grič), dužina dionice L=520,00 m i širina asfalta 3,50 m, ukupnog iznosa po predmjeru i predračunu radova sa uračunatim PDV-om 65.158,41 KM, gdje su građani koji žive u pomenutom putu prikupili nedostatan iznos sredstava od 13.500,00 KM i isti dostavili na račun Općine Gračanica za rekonstrukciju pomenutog puta te je Općina Gračanica objavila obavještenje o nabavci za rekonstrukciju puta dionice I (jedan) (Put M4 (Doboj-Tuzla) Grič) za koji dio do današnjeg dana nije izvršena rekonstrukcija.

Zahtijevamo da Općina Gračanica uvrsti rekonstrukciju puta dionice I (jedan) (Put M4 (Doboj-Tuzla) Grič), dužina dionice L=520,00 m i širina asfalta 3,50 m, ukupnog iznosa po predmjeru i predračunu radova sa uračunatim PDV-om 65.158,41 KM u naredni budžet Općine Gračanica i time ispravi greške koje su načinjene građanima koji žive na potezu pomenute dionice. Molimo Vas da ovaj zahtjev shvatite ozbiljno i na isti odgovorite u roku od 30 dana.

Ukoliko ne dobijemo pozitivan odgovor za navedeni zahtjev naša prava potražiti ćemo pravnim putem i svu dokumentaciju koju posjedujemo predate nadležnim institucijama, kao što su OSA, SIPA, Tužilaštvo TK i druge relevantne institucije. Ovdje su potpisi građana kao i dokumentaciju da je raspisan tender za put M4 Grič, a urađeno je za drugu dionicu.

Vijećničko pitanje glasi:

“Pitanje upućujem direktoru Veterinarske stanice Gračanica, zbog čega radnici Veterinarske stanice Gračanica vrše puštanje pasa lualica iz azila u mjesne zajednice.

Obrazloženje:

Već duže vremena primjećeno je da vozilo Veterinarske stanice Gračanica u kasnim poslijepodnevnim satima vrši dovoz i istovar pasa lualica iz azila u mjesne zajednice općine Gračanica. U posljednje vrijeme primjećen je povećan broj pasa lualica koji su uredno obilježeni od strane Veterinarske stanice, a posebno alarmantno stanje je na području MZ Stjepan Polje, gdje lualice formiraju čopore te nerijetko napadaju stoku i ljude, te nanose velike štete u lovištu. Kako sam upoznat Gračanica posjeduje azil za pse koji treba da služi za sklanjanje pasa sa ulice, a ne za njihovu distribuciju po mjesnim zajednicama. Građani općine Gračanica se pitaju zbog čega se iz budžeta svake godine izdvaja nekoliko desetina hiljada maraka za zbrinjavanje pasa lualica kada je primjetno da Veterinarska stanica očigledno ne radi svoj posao”.

Druga vijećnička inicijativa je:

“Inicijativu upućujem Općinskom načelniku da za neku od narednih sjednica pripremi odluku o uslovima i načinu držanja pasa i mačaka.

Obrazloženje:

Brojne općine u BiH su u proteklom periodu dobijale ovu odluku, te smatram da bi i Općina Gračanica u cilju rješavanja problematike pasa lualica trebala da pristupi izradi i donošenju ovakve odluke. Ovakva odluka bi trebala da sadrži obaveze vlasnika pasa kako prema psima tako i prema duštvenoj zajednici. Ova odluka bi između ostalog trebala da sadrži i odredbu koja obavezuje vlasnike da čipuju, vakcinišu i registruju svoje ljubimce u cilju praćenja njihovog kretanja, kao i kaznene odredbe u slučaju pronalaska psa kako slobodno luta. Smatram da je u cilju rješavanja problematike pasa lualica potrebno napraviti i registar pasa. Takođe smatram da bi odlukom trebalo da bude definisana i odredba da ukoliko vlasnik želi da se riješi svog ljubimca dužan je da uplaćuje azilu svakoga mjeseca potrebna sredstva za ishranu i brigu o psu, do udomljavanja ili uginuća psa”.

Sjednici je pristupio i Hasan Puškar, tako da je prisutno svih 30 članova Vijeća.

Šehić Edin:

“Za današnju sjednicu imam jednu vijećničku inicijativu i dva pitanja.

Kao što znate na prošloj sjednici nismo kandidovali pitanja i inicijative, nije nam bilo omogućeno. U suštini prepravio sam datume i iznijet ću to danas.

Inicijativa i pitanja su prezentovani i elektronski.

Vijećnička inicijativa glasi:

“Da se u procesu kupovine imovine MI Fering d.d. od strane Općine Gračanica, za potrebe razvojnog inkubacionog centra i sajmišta, kako se iznosilo na jednom od općinskih vijeća Gračanica, a prije svega sa ciljem uvezivanja staža i penzionisanja obespravljenih radnika ovog nekadašnjeg gračaničkog giganta, primjene ranije metode otkupa imovine (upravna zgrada, društvena ishrana i zemljište, itd.). Putem suda od strane založnika na imovini, ranije je to bila banka, a sada Porezna uprava Federacije BiH, to je trenutno najbrže i najpovoljnije rješenje za sve strane koje bi se našle u ovom procesu, a posebno za obespravljene radnike, čiji bi staž bio uvezan.

Obrazloženje:

U vrijeme dok sam lično radio u MI Fering d.o. Gračanica, period 2001-2003., na poslovima šefa računovodstva, vršile su se prodaje založene imovine Feringa od strane banaka, naravno putem suda, gdje su kupci bili oni koji su ponudili najbolje uslove i cijenu, čime je gotovo sva značajnija nepokretna imovina Feringa prodana i otuđena, osim proizvodnih hala na koje založno pravo prvog upisa ima porezna uprava. Na žalost, za dugogodišnje loše poslovanje i agoniju još niko nije procesuiran zbog nesavjesnog poslovanja, a veliki upitnik je i zašto? Trenutno preovladava interesovanje općine da se navedene hale i prostorije preurede u sajmište i inkubaciono-razvojni centar za tehnološke inovacije, obuku i usavršavanje budućih kadrova naših učenika, što smatram odličnim projektom, a sa druge strane preovladava i interesovanje Porezne uprave da naaplati svoja potraživanja i uveže staž obespravljenim radnicima, čime je najbrže, po meni i najbolje rješenje za sve zainteresovane strane u procesu, da Porezna uprava putem suda oglasi javnu prodaju nekretnina Feringa pod hipotekom, te zbog društvenog značaja i razvoja tih nekretnina, sud omogući općini pravo preče kupovine. Tražim od općinskog pravobranilaštva da me upozna o dosadašnjim preduzetim koracima na rješavanju pitanja Feringa, kao i lični stav o podnešenoj inicijativi”.

Prvo vijećničko pitanje glasi:

“Postoji li nadzorni organ ispred investitora/Općine Gračanica u vezi aktuelnih asfaltiranja puteva na području općine Gračanica, gdje se uopšte ne rade kanali/odvodi površinskih voda. Koji garantni rok i za šta garantira izvođač radova, te da li je izvođač odgovoran i obavezan izvršiti popravke u garantnom roku o svom trošku?

Obrazloženje:

U posljednje vrijeme, svjedoci smo sve češćeg asfaltiranja manjih dionica puteva/sokaka, gdje se građani pitaju da li je to novija tehnologija pa se ne rade odvodni kanali za površinske vode ili nešto drugo, njima neshvatljivo? Na više dionica urađeno je asfaltiranje puteva bez bilo kakvih odvodnih kanala, nabrojat ću neke: Bulakov Sokak, Imamovića Sokak, Bahići-Borici kao posljednji u nizu, koji osim što nema odvodnih kanala, završen je u pola uzbrdice, čime je vrlo izvjesno brzo podrivanje asfaltne podloge i oštećenja koja će osjetiti sudionici saobraćanja na navedenim dionicama. Nastavkom ovakve prakse, bojim se da je ovo “bacanje novca građana”, kao i nesaglediva šteta za budžet općine Gračanica. Ukoliko je investitor obezbijedio dobre garancije za izvršenje radova/asfaltiranja sa izvođačem radova, onda ovakav način rada ima djelimično opravdanje, u protivnom ne. U prilogu nekoliko fotografija, asfaltiranih spornih dionica”.

I drugo vijećničko pitanje glasi:

“Da li je trenutni tehnički sekretar Općinskog vijeća Gračanica uposlen u skladu sa zakonskim propisima i procedurama (konkursom i javnim pozivom), ako jeste, tražim da mi se taksativno odgovore provedene procedure sa priložima dokumenata, te da li je tehnički

sekretar državni službenik i politički neovisno lice, kako nalaže član 4. tačka F. Zakona o državnoj službi?

Obrazloženje:

Obzirom da je prije nekoliko dana na društvenim mrežama, javno izneseno da postoje indicije da je tehnički sekretar Općinskog vijeća zaposlen bez provedenih procedura javnog poziva i konkursa, kao i da isti ne poštuje član 4. tačka F. Zakona o državnoj službi, koji obavezuje državnog službenika da mora zakonski poštovati političku nezavisnost i nepristrasnost niti jednoj političkoj opciji, a s druge strane prozvano je Općinsko vijeće Gračanica, kao zakonodavni organ, da o navedenom ne "poteže" pitanje, moja dužnost, kao člana istog zakonodavnog organa, jeste da se preispitaju navedene indicije i daju odgovori na postavljena pitanja. Ovo uopšte nije bilo kakav lični napad na tehničkog sekretara Općinskog vijeća Gračanica, već samo pitanje da li su provedene sve potrebne zakonske procedure u vezi uposlenja istog. Na žalost, odgovor na pitanje političke neovisnosti biće malo teže obrazložiti i dokazati, uzmemo li u obzir fotografije na kojim se nalazi tehnički sekretar/državni službenik, objavljene na FB stranici političkog subjekta, koji je ujedno i zakonodavna i izvršna vlast na općini Gračanica. Fotografije u prilogu".

Hasić Ibrahim:

"Imam jednu inicijativu koja glasi:

Upućujem vijećniku inicijativu prema nadležnom organu Općine Gračanica, a koja se odnosi na rješavanje pitanja uzurpiranih javnih površina i javnih saobraćajnih površina (lokalnih puteva) u Mjesnoj zajednici Malešići.

Obrazloženje:

Već sam u nekoliko navrata postavljao ovo pitanje kroz svoj vijećnički angažman koji je dug 15-ak godina, a da pri tome nisam naišao na razumijevanje nadležnih za rješavanje ovog problema u Mjesnoj zajednici Malešići.

Naime, opće je poznato da se u svim mjesnim zajednicama, pa tako i u MZ Malešići neodgovorni pojedinci su izvršili uzurpacije kako javnih površina, tako i javnih saobraćajnih površina (lokalnih puteva), te iste površine priveli različitim namjenama. Imamo slučajeve da su uzurpirane površine veće od samih parcela u vlasništvu na kojima su izgrađeni stambeno-porodični objekti, a same uzurpacije navedenih površina uskraćuju pravo korištenja ostalim građanima.

Kako svi građani imaju pravo korištenja javnih površina, javnih saobraćajnih površina tražim od nadležnog organa da u što hitnijem roku preduzmu odgovarajuće mjere u cilju rješavanja navedenog problema i da građanima vratimo uzurpirane površine jer one njima i pripadaju.

Također napominjem, da se veći broj uzurpanata koji su uzurpiranu površinu priveli namjeni pokazuju dobru volju da se navedeni problem riješi na način da oni izvrše otkup pomenutog zemljišta na zakonit način. Napominjem da je gosp. Delić Omer iz Malešića već otkupio dio uzurpiranog zemljišta. Mislim da bi bio red da se ovo završi govorim za Malešiće, a toga ima sigurno i u drugim mjesnim zajednicama. Red bi bio da se ovo dovede u red i završi".

Mujkić Mirsad:

"Ja za danas imam jednu vijećničku inicijativu i jedno kraće pitanje:

Inicijativu upućujem Općinskom načelniku i nadležnim službama da se poduzmu aktivnosti na sanaciji dijela puta na relaciji Gračanica-Malešići u Kamenolomu.

Obrazloženje:

Na inicijativu većeg broja građana koji koriste ovu dionicu puta, a i vlastitim uvidom, uvjerio sam se u oštećenje navedene dionice puta. Naime, jedan dio puta je zbog djelovanja vremenskih neprilika i teretnih kamiona koji prolaze ovom dionicom sužen odnosno znatno

oštećen i koristi se samo jedna kolovozna traka/strana. Svakodnevno navedenu dionicu koristi veliki broj građana, te postoji realna opasnost za izazivanje saobraćajnih nesreća i samim time sigurnost građana je ugrožena. Smatram da je neophodna hitna sanacija ove dionice, kako ne bi došlo do neželjenih posljedica.

Vijećničko pitanje glasi:

“Kada će doći na Vijeće prijedlog izmjene regulacionog plana radna zona I, II i III, obzirom da je cijela procedura koja je predviđena zakonom, završena?”

Općinski načelnik Nusret Helić dao je neke odgovore:

“Evo djelimično ću odgovoriti na dva pitanja. Kad su u pitanju Lendići. Ne plaćaju oni gore nikakve ni naknade ni rente jer se radi o području van zone gradskog građevinskog zemljišta, a problem vode je vezan za MZ Lendići, jer ona ne pripada MZ Gračanica. Ima projekat koji je krenuo i ja vjerujem da će dobiti zeleno svjetlo slijedeće godine. Nakon Bijelih Polja, seljanuše, ide jedna linija u Lendićima i nadam se da ćemo svi zajedno biti sretni što se toga tiče. Dakle, ne plaćaju oni nikakve rente, oni su van gradskog građevinskog zemljišta.

I hoću da odgovorim Šehiću na pitanje vezano za tehničkog sekretara. Sekretar je Općinskog vijeća, a ne tehnički sekretar pa ispravka za to, vjerovatno je lapsus, onako. Konkretno, o našem sekretaru vijeća je da je on na javnom konkursu prošao za državnog službenika 2007. godine. dakle, na konkursu koji je išao preko Agencije za državnu službu i tada je obnašala poslove Višeg stručnog saradnika. Nakon što je zehra, ranije penzionisana načelnik je iskoristio pravo i privremeno postavio nju za sekretara. Nakon što je Zakon o državnoj službi Kantona, izašao i regulisao pitanje internog premještaja članovi 32. i 37. zakona regulišu upravo pitanje prijema, interni premještaj u državnoj službi u skladu sa članom 33, načelnik je donio Rješenje kojim postavlja nju za sekretara. Dakle, nakon napredovanja u službi ispunjava sve uslove i na zakonit način je ona izabrana za sekretara Općinskog vijeća. U novom Pravilniku, a isključiva nadležnost je načelnika da utvrđuje organizaciju organa, nakon što vi donesete odluku o osnivanju, planirali smo obzirom da smatramo i danas da sekretar Vijeća nema dovoljno posla, jedinstveno je radno mjesto sekretar organa i Općinskog vijeća. Sekretar organa je jedna velika i zakonita funkcija koja ima svoj značaj i u narednom periodu jer ispunjava uslove, biti će postavljena za sekretara organa i Općinskog vijeća. Dakle, potpuno zakonito i koji god dokument treba Šehiću, dostavit ćemo.

A to što se tiče ovog drugog dijela u kome ste pokazivali slike, kad je u pitanju politička neovisnost itd. ja ću posjetiti za sve.

Nespojivost sa dužnostima državnog službenika regulisana je članom 30. zakona o državnoj službi TK u kojem je navedeno da državni službenik ne može biti član upravnih i nadzornih organa političkih stranaka, a nije zabranjeno članstvo u stranci, a da napomenem da je Općini Gračanica dostavljeno mišljenje Ministarstva pravosuđa i uprave TK koje je usvojila i Vlada TK prema kojem se daje tumačenje navedenog člana i prema kojem državni službenici i namještenici čak mogu biti i općinski vijećnici jer Vijeće nije zakonodavni organ nego predstavnički, a zakon o državnim službenicima ne zabranjuje da budu ni kandidati na općim izborima. Dakle, potpuno je zakonito ponašanje sekretara Vijeća i u skladu je sa Kantonalnim zakonom o državnoj službi. Pa evo da imate i tu informaciju, a za ostala pitanja dobit ćete odgovor”.

Šehić Edin:

“Naravno načelnik je sam zadovoljan odgovorom jer ovo su i građani tražili, da je zaista po svim procedurama sve ispoštovano. Što se tiče stranačke pripadnosti naravno iz vaše je partije, Vi ćete to braniti, to se slažem. Ali evo ako nema posla, možda Dženana da bude sekretar SDP-a. Malo sam se šalio, izvinjavam se. Šalim se”.

Predsjedavajući Vijeća Nihad Krajinović je upozorio vijećnika, da replicira i da ne vrijeđa.

Riječ je zatražila Dženana Tukulj, sekretar Općinskog vijeća Gračanica i iznijela slijedeće:

“Poštovani, evo ja sam uredno pustila i slike koje ste uzeli iz nedjelje, van radnog vremena. Znači, ja po vama nemam pravo na privatni život i evo drugi puta je šala na moj račun. Jako je ružno gospodine Šehiću što ste ovo pitanje, koje ste danas ovdje pročitali, a ne zanimaju me razlozi zašto niste ga postavili, a prije svega objavili na društvenim mrežama i napravili medijski linč bez mog prava da nešto odgovaram. Ja se neću raspravljati na društvenim mrežama. Ja nisam uradila ništa nezakonito, jesam li član partije ili ne, u privatnom životu u nedjelju, niti Vijeće niti bilo ko nema pravo da utiče na moj privatni život. Ja ovdje nisam došla u majici, a vi ste prvi koji ste pokazivali neke stranačke pripadnosti na samoj sjednici Vijeća”.

Za diskusiju se javio Vahidin Smajlović, ali na intervenciju Puškar Hasana koji je napomenuo, da nije u redu da se o pitanjima i odgovorima vodi rasprava, jer je on predlagao da to bude kao tačka dnevnog reda, što nije prihvaćeno, a sad se otvara rasprava.

Predsjedavajući Vijeća je zatvorio raspravu.

Za govornicu je izašla Jasminka Imširović i dala odgovor na pitanje Šehić Edina vezano za Feringovo zemljište i otkup:

“Vezano za inicijativu, više je upit od vijećnika Šehića, želim istaći da hipotekarni odnosno založni povjerilac sam određuje način naplate svojih potraživanja. Znači, mi Općina kao zainteresirani kupci ne možemo njima usmjeravati šta će donijeti. Međutim, moram vas upoznati, što se tiče Poreske uprave. Ona jeste zakonski založni povjerilac, međutim direktor Poreske uprave je istakao i rekao, obzirom da se oni nalaze na 46-om mjestu naplate potraživanja, da oni nemaju namjeru pokrenuti naplatu potraživanja, s tim što vam moram reći, naplata poreskih dugovanja, ne vrši putem suda nego Zakon o poreskoj upravi, naplatu potraživanja vrši u upravnom postupku a ne u sudskom postupku. Ali oni nisu zainteresovani, jer to rade samo u slučaju gdje su jedini kao založni povjerioci odnosno samim tim i zakonski povjerioci. To je to što se tiče toga. A sada mada to nije pitanje, pretpostavljam da vijećnik Hasić misli na one uzurpacije koje su već evidentirane i pokrenut je postupak, to se može putem Odluka i više puta smo o tome raspravljali. To će da li Vijeće pokrenuti inicijativu, da se donese jedan elaborat, mislim postoji način, mi to možemo uraditi. Znači elaborat i putem objave prodaje ili putem kako je to riješio gosp. Delić što ste pokrenuli. Ima i drugi način, znači postoji alternativa da se to riješi”.

Predsjedavajući Vijeća je upoznao članove Vijeća da je Predsjednik vijeća MZ Lendići izrazio želju da se obrati Općinskom vijeću Ejub Hasić predsjednik vijeća MZ Lendići iznio je slijedeće:

“Poštovani predsjedavajući, članovi Općinskog vijeća, gospodine načelnice i ostali prisutni, ja sam Ejub Hasić, Predsjednik Vijeća MZ Lendići.

Hvala što ste mi omogućili, da se u ime Vijeća MZ Lendići, obratim kao predsjednik i iznesem naše dugogodišnje probleme, koje sami nismo u stanju riješiti.

Kako vam je poznato, Lendići su prije rata imali svoju mjesnu zajednicu. tokom rata, ona je prestala egzistirati, sve do 2012. godine, što je dovelo do ekonomskog i svakog drugog zastoja. U to vrijeme smo praktično bili ničiji.

Nakon konstituisanja Vijeća najmlađe Mjesne zajednice, a po svim parametrima i najnerazvijenog naselja u općini Gračanica, u obnovu se krenulo praktično od nule. Trebalo je bar donekle sanirati propale puteve, boriti se sa nestaćicom pitke vode, javnom rasvjetom, pa i brojnim klizištima.

Uzimajući sve rečeno, a vodeći računa o ravnomjernim razvojem naših mjesnih zajednica, od zakonodavne i izvršne vlasti naše općine tražimo da se u budžetu za narednu 2019. godinu uvrste naši prioriteti, koje smo već dostavili predsjedavajućem Općinskog vijeća, načelniku Općine, klubovima političkih stranaka, da nas podržite radi s eo priključenju naših građana na priključenje na gradski vodovod, na urgentnoj sanaciji dva klizišta koja prijete da prekinu glavnu komunikaciju kroz naselje i ugroze novosagrađeni vjerski objekat, te dovršetak javne rasvjete, kao i nastavak asvaltiranja glavnog puta.

Na kraju predlažem da ovo Općinsko vijeće formira komisiju, koja bi zajedno sa članovima Vijeća MZ, obišla naselje Lendići i uvjerila se na licu mjesta u naše iskrene i opravdane zahtjeve i molbe. Želim da vam se zahvalim na ustupljenom vremenu”.

Vijeću se obratila i Mersiha Jogunčić, predstavnica Etičke komisije Općinskog vijeća i iznijela sljedeće:

“Poštovane vijećnice i vijećnici, želim da u ime Etičke komisije izrazim zadovoljstvo i pohvalim političke subjekte i kandidate/kinje koji su sudjelovali u kampanji za opšte izbore, jer je kampanja na području naše opštine protekla bez incidenata, u skladu sa Etičkim kodeksom i generalna ocjena Komisije je da je kampanja bila pozitivna i da su svi politički subjekti ispoštovali prije svega ljudske i kolegijalne norme i nisu kršili Etički kodeks.

Takođe, u ime Komisije, ali i svoje lično ime čestitam svim kandidatima/kinjama koji su izabrani uz više nivoe vlasti i želim im uspješan rad.

Sljedeća tema, na koju ću se kratko osvrnuti jeste kritika političkim subjektima, a odnosi se na događaj prije kampanje, tj. na radionicu koju je ova Komisija organizovala i održala 02. 07. 2018. godine. Tema radionice odnosila se na rodnu ravnopravnost i zastupljenost žena u političkim subjektima na području naše općine te njihov status i eventualne funkcije. Mislim da sam pogled na saziv sastava Općinskog vijeća daje odgovor o važnosti ove teme. Svim političkim subjektima upućen je poziv za prisustvo radionici, međutim samo 2 političke stranke su imale predstavnice i učionice radionice. To su SDP i SDA. Ostali politički subjekti su se oglušili na poziv Komisije.

Molila bih vas, kao izabrane zvaničnike/a da u svojim političkim subjektima iskomunicirate ove i slične situacije, kako se u buduću nebi ponavljale, jer će Komisija i u narednom periodu organizovati radionice sa istim ili sličnim temama i očekujemo da ćemo imati predstavnike/ce iz većine političkih subjekata. Važno je da vi kao vijećnici/ce objasnite i naglasite u svojim političkim strankama, da je potrebno poštovati rad svih Komisija koje ste vi kao Općinsko vijeće formulisali i time verifikovali važnost rada istih.

Zahvaljujem na pažnji i želim vam uspješan današnji rad. U narednom periodu će se dešavati ovo vezano za posjete MZ-a i bit ćete naravno na vrijeme obaviješteni i vi i predstavnici vijeća MZ-a.

Predsjedavajući Vijeća je naglasio da je vijećnicima uručen dopis za predlaganje tema za program rada Općinskog vijeća za 2019. godinu i zamolio ih da se odazovu dopisu i uzmu učešća u izradi programa.

Na zahtjev predsjednika Kluba vijećnika SDA data je pauza u trajanju od petnaest minuta. U nastavku sjednice prešlo se na raspravu o predloženom dnevnom redu 23. Sjednice Općinskog vijeća koji glasi:

D N E V N I R E D :

1. PROJEKAT OPĆINSKOG OKOLIŠNOG I EKONOMSKOG UPRAVLJANJA (MEG) – OBUKA 2: ETIČKI KODEKS OV; VIJEĆNIČKA PITANJA; PROCJENA NAPRETKA PO AKCIONOM PLANU, UTVRĐIVANJE PRIORITETA I SLJEDEĆIH KORAKA.

2. RAZMATRANJE I USVAJANJE ODLUKE O IZMJENAMA I DOPUNAMA BUDŽETA OPĆINE GRAČANICA ZA 2018.GODINU.
3. RAZMATRANJE I USVAJANJE NACRTA BUDŽETA OPĆINE GRAČANICA ZA 2019.GODINU.
4. RAZMATRANJE I USVAJANJE NACRTA ODLUKE O NAČINU IZVRŠAVANJA BUDŽETA OPĆINE GRAČANICA ZA 2019.GODINU.
5. RAZMATRANJE I USVAJANJE ODLUKE O PRODAJI NEKRETNINE.
6. INFORMACIJA O STANJU IZ OBLASTI VODOSNABDIJEVANJA NA PODRUČJU OPĆINE GRAČANICA.

Dnevni red je usvojen jednoglasno bez učesnika u diskusiji.

TAČKA 1

PROJEKAT OPĆINSKOG OKOLIŠNOG I EKONOMSKOG UPRAVLJANJA (MEG) OBUKA 2: ETIČKI KODEKS OV; VIJEĆNIČKA PITANJA; PROCJENA NAPRETKA PO AKCIONOM PLANU, UTVRĐIVANJE PRIORITETA I SLJEDEĆIH KORAKA.

Uz elektronsku prezentaciju obrazloženje po prvoj tački dnevnog reda dala je Snežana Dačić. U sklopu ove tačke vijećnicima je dostavljen upitnik za popunu i potpis.

TAČKA 2

RAZMATRANJE I USVAJANJE ODLUKE O IZMJENAMA I DOPUNAMA BUDŽETA OPĆINE GRAČANICA ZA 2018.GODINU.

Uvodno obrazloženje je dao Općinski načelnik Nusret Helić:

„Dozvolite mi da dam dodatna obrazloženja i pojašnjenja Odluke o izmjenama i dopunama budžeta Općine Gračanica za 2018.godinu.

Podsjetit ću, da smo krajem decembra 2017.godine usvojili budžet u iznosu od 13.397.985 KM kojeg smo tokom godine korigovali i u njega uvrstili namjenske grantove za iznos 413.370 KM, tako da je rebalans rađen u odnosu na korigovani budžet od 13.833.881 KM.

Osnov za uvrštavanje ovih namjenskih sredstava je Odluka o izvršenju budžeta i uputstvo o načinu planiranja, prikupljanja, evidentiranja i korištenja uplaćenih ili prenesenih a manje planiranih pomoći, donacija, prihoda, za potrebne namjene i grantove. U obrazloženju rebalansa imate pojašnjenje koje su to namjene i izdaci.

Rebalansom je budžet planiran u iznosu od 13.811.305 KM, manji za 22.576 KM, od čega su prihodi 12.930.912, primitci 205.765 KM i višak prihoda od 958.674 KM (veći je u odnosu na plan budžeta za 2018.godinu za 155.705 KM).

Zašto rebalans budžeta:

Zato što se mijenja struktura prihoda, za neke izdatke trebaju veća sredstva, posebno kada su kapitalni projekti u pitanju, a ukazala se potreba i za neke nove projekte iz namjenskih sredstava viših nivoa vlasti a i budžeta.

Kada su u pitanju ukupni prihodi po rebalansu su oni manji za 284.046 KM (porezni veći za 72.654 KM, neporezni veći samo za nešto više od 1.000 KM, ali su grantovi, potpore manje za 355.839 KM). Strukturu svih prihoda imate u materijalu i obrazloženju.

Ukupni izdaci po rebalansu su 13.811 KM i oni su rađeni na bazi izvršenja za 8 mjeseci, izdatih rezervacija, potpisanih ugovora, pokrenutih procedura, viška prihoda iz

prethodne godine, grantovi viših nivoa vlasti, naše procjene kretanja izdataka do kraja godine i potreba za finansiranjem funkcionisanja službi, Vijeća i drugih sektora.

Šta se sve mijenja u izdacima vidjeli ste iz materijala obrazloženja, a ja ću spomenuti samo neke i dati pojašnjenja:

-Veći su izdaci za zimsku službu za 85.000 KM, a odnose se na obavezu po ugovorima i situacijama za 2017. i 2018.godinu i nabavku soli i posipnog materijala za 2018. i 2019.godinu.

- Naknade za povrat više uplaćenih sredstava veće su za 23.000 zbog jednog rješenja o povratu pogrešno uplaćenih poreza za naš budžet.

- Za rad stručnih komisija, vijećničkih komisija, harmonizaciju i drugo, veća su sredstva zbog većeg obima i troškova, te usklađivanja određenih naknada sa rastom prosječnog ličnog dohotka u Federaciji BiH.

- Grantovi i obaveze klubova prema savezima, zbog većih troškova, ali i ulaska 2 naša kluba u Premijer ligu – Kaskada i Rukometni klub Gračanica.

- Bruto plaće su manje za 45.800 KM, jer zbog dugih procedura još nije primljen planirani broj službenika. Procedure traju više od godinu dana tako da smo skinuli sa ove stavke jer neće biti realizovana u ovoj godini.

- Povećana je budžetska stavka kapitalni grant sportskim klubovima za 160.000 KM, a odnosi se na izgradnju Nogometnog terena sa vještačkom travom koji će uskoro biti završen i dat na korištenje. Kako se zaista radi o dugoročnom projektu (garancija 20 godina, organizovat ćemo zvanično otvorenje.

-Na većem broju kapitalnih izdataka došlo je do značajnijeg povećanja ili zbog prispjelih namjenskih sredstava viših nivoa i uplata građana ili zbog većih cijena nakon provedenog postupka javne nabavke (Put Malta Nurkići, toplifikacija, izrada projekata, put Bahići, put Malešići-Stjepan Polje, putevi u Malešićima, putevi Vranovići, putevi Doborovci, Pribava, regulacija Sokoluše i dr.).

Porasle su cijene bitumena, a istovremeno i nestašica zbog havarije u rafineriji Brod, što dovodi u pitanje i realizaciju nekih projekata. Takođe su porasle dnevnice i plate radnika, te je i to uticalo na porast cijena, pa su razlike na tenderima.

Neki kapitalni projekti nisu prošli od viših organa vlasti, u Stjepan Polju put Grič pa ćemo ih planirati u 2019.godini, kao i neke druge za koje se nisu stekli uslovi da se uradi u ovoj godini.

Nove stavke u budžetu (vidjeli ste koje) rezultat su namjenskih sredstava viših nivoa vlasti.

Trebalo nam je zaista puno vremena da izvršimo procjenu i kada su u pitanju prihodi, ali i izdaci i pripremimo rebalans nadajući se da neće doći do značajnijih promjena u planu prihoda, a rashode ćemo svakodnevno pratiti i ne dozvoliti da dođe do prekoračenja, bar onih gdje mi možemo uticati. Predlažem da usvojite rebalans budžeta kako bi nastavili realizaciju, posebno kapitalnih projekata koji su u toku ili za one koje sad pokrećemo.Evo toliko i hvala“.

Učesnici u diskusiji su:

Osman Sulejmanović je iznio stav Komisije za budžet:

„Komisija za budžet je održala sjednicu i razmatrala Odluku o izmjenama i dopunama budžeta Općine Gračanica za 2018.godinu. Imala je nekih sitnih primjedbi ali predlaže Vijeću da usvoji ovakav rebalans“.

Edin Šehić:

„Obzirom da je ovo bitan dokument budžet Općine Gračanica gdje se sadrže sva naša dešavanja, ave aktivnosti tokom godine, što mi kao zakonodavno tijelo donesemo, odnosno izglasamo a načelnik to izvršava ja sam studiozno tome pristupio jer je to moja struka i analizirao ovaj rebalans. Nastojat ću biti što kraći. Obzirom da sam pripremio to u

tekstualnom obliku čitat ću da budem što brži. Određene stvari želim da mi se pojašne i naravno sa svojim komentarima želim da se osvrnem na neke po meni nelogičnosti i stvari koje mi nekako udare na prvi pogled kao nedovoljno jasne.

Pitanja u vezi rebalansa budžeta za 2018.godinu:

1. Ekonomski kod 613727, Izdaci za održavanje video nadzora u gradu, planirano 70.000 KM, povećanje za 3.000 KM, ukupno 73.000 KM. Obzirom da nemamo video nadzor u gradu, tražim pojašnjenje.

2. Ekonomski kod 613727, horizontalna, vertikalna signalizacija, ukupan iznos od 20.000 KM, do 31.08.2018.godine izvršeno 1.329 KM. Koji projekti su financirani u iznosu od 1.329 KM, koji su projekti planirani da se financiraju sa ostatkom sredstava do planiranog iznosa, a obzirom da se dotičemo teme horizontalne i vertikalne signalizacije na području naše općine, kakva je sudbina postavljenih semafora (popravka, uklanjanje i prodaja kao polovne stvari itd.)

3. Ekonomski kod 613934, Izrada nove WEB stranice, planirano 1.500 KM, umanjuje se na 1.200 KM, a ništa nije utrošeno. U više navrata, više od godinu i po, postavljano pitanje kada će biti u funkciji nova, savremenija, potpunija i transparentnija WEB stranica Općine Gračanica. I dalje nema odgovora niti dijela, da li to znači da ćemo sa 1.200 KM napokon završiti taj posao i početkom iduće godine imati novu WEB stranicu?

4. Ekonomski kod, Izdaci za rad komisija (komisija za procjenu nekretnina, vjenčanja itd.) planirano 10.000 KM. Izvršeno do 31.08.2018.godine 4.900 KM, povećanje za dodatnih 10.000 KM. Ako se rukovodimo činjenicom da je za prvih 8 mjeseci realizirano 49 % prvobitno planiranih sredstava, na koji način možemo opravdati činjenicu da ćemo u posljednja 4 mjeseca izdvojiti gotovo mjesečno ono što smo utrošili za prvih 8 mjeseci?

5. Ekonomski kod, Izvršenje rješenja urbanističko-građevinske inspekcije, planirano 10.000 KM, rebalansom se stavka briše u cjelosti. Da li je urbanističko-građevinska inspekcija Općine u ovoj godini izdala određena rješenja kada je u pitanju kršenje propisa građenja i da li je opravdano „brisanje“ ove stavke, ukoliko znamo da je na terenu sasvim drugačija situacija. Da li to NIKO NE SMIJE preuzeti na sebe odgovornost izvršenja rješenja urbanističko-građevinske inspekcije?

6. Ekonomski kod 613991, Postavljanje klizališta u gradu, planirano 50.000 KM, povećanje za 11.000 KM i odmah ću se dotaći nacrtu budžeta gdje je 70.000 KM. Iz godine u godinu stavka za klizanje se povećava, data je na upravljanje Sportskom savezu (naplata ulaznica, redari i slično), mišljenja sam da trebamo dobiti povratne informacije, tačnije ekonomsku računicu, svjesni da je ona „veliki minus“, a s druge strane dobra stvar u našem gradu, ali sa ovakvim tempom povećanja izdvajanja iz godine u godinu, interesuju me akteri oko kompletne organizacije, kao i analitika troškova za jednu sezonu?

7. Ekonomski kod 613991, Osnivanje Turističke zajednice, planiran iznos od 10.000 KM, ništa nije izvršeno do 31.08.2018.godine. Zašto se ovoliko odugovlači sa osnivanjem Turističke zajednice, koja nam je neophodna kao polazna osnova za identifikaciju i razvoj turističkih potencijala na našoj općini?

8. Ekonomski kod 614311, Sportski savez općine, planirano 20.000 KM, do 31.08.2018.godine izvršeno 8.100 KM. Uzmemo li u obzir činjenicu da smo pred kraj godine, kada su i sportske aktivnosti znatno smanjene, zbog čega ostaje u budžetu stavka za izvršenje za posljednja 4 mjeseca u iznosu od 11.900 KM, koja je znatno veća za 4 u odnosu na prvih 8 mjeseci?

9. Ekonomski kod 614311, Transfer-Dječije obdanište „Naša djeca“, povećanje za 5.000 KM, na ime sufinansiranja troškova produženog boravka. Da li je OK da općina/budžet finansira troškove produženog boravka, koji se organiziraju u obdaništu, za nekoliko korisnika/djece...Pominjali smo da to nije u skladu sa pedagoškim standardima i propisima, niti obdanište ima ljudske i tehničke kapacitete za ovakav vid usluge, što dovodi u pitanje kvalitet usluge za korisnike obdaništa. S druge strane, šta ćemo sa ostalim koji imaju potrebe da njihova djeca budu negdje na „čuvanju“. Da li je ovo obaveza Općine?

10. Ekonomski kod 614324, Grant za vjerske zajednice, NOVI iznos u rebalansu od 2.000 KM. Na šta se odnosi?

11. Ekonomski kod 615311, Grant MZ Škahovica za kupovinu zemljišta, NOVI iznos u rebalansu od 2.000 KM. Na šta se odnosi?.

12. Ekonomski kod 615511, Toplifikacija, NOVI iznos u rebalansu od 30.000 KM. Na šta se odnosi? Već sam dobio odgovor.

13. Ekonomski kod 615211, Mjere energijske efikasnosti na zgradama, planiran iznos od 50.000 KM, briše se u cjelosti. Pretpostavka je da sredstva nisu odobrena od viših nivoa, jer su po budžetu planirana iz granta. Čime i jeste osnov da se rebalansom „brišu“, ali to nije razlog da se u nacrtu budžeta za 2019.godinu slična stavka veže za konkretnu zgradu na Lukama. Potrebno je omogućiti da na navedena sredstva, po osnovu mjera energijske efikasnosti/utopljavanja stambenih jedinica, mogu aplicirati svi stanovnici općine Gračanica, prema jasno utvrđenim kriterijima. Da ne bude favorizovana određena zgrada.

14. Ekonomski kod 821211, Izgradnja sportske dvorane, planirano 43.449 KM budžetom i 397.000 KM grant kantona, gdje se iznos granta briše jer je propalo obećanje Vlade TK. Ukoliko je izostala podrška kantona, gdje je izvjesno da se ne može bilo šta uraditi sa malim sredstvima na ovom objektu, zašto se onda u cjelosti nije brisala ova stavka budžeta, već je ostala u budžetu stavka 43.449 KM.

15. Ekonomski kod, vodosnabdijevanje u MZ Lukavica, planirano 70.000 KM budžet i 40.000 KM grant, koji se briše u cjelosti. Šta se planiralo raditi za 70.000 KM u MZ Lukavici, odnosno ako se odustalo od projekta zbog izostanka podrške kantona, zašto je ostao dio u budžetu?

16. Ekonomski kod 821618, Kanalizacija Javor Bahići, planiran grant 40.000 KM, da bi vjerovatno uslijed nedostatka sredstava iz granta, rebalansom 15.000 KM finansira se iz budžeta, a 25.000 KM iz granta. Ovakva praksa se primjenjuje samo u izuzetnim slučajevima, da se nedostatak grant sredstava, planiranih za realizaciju projekta po budžetu, namiri rebalansom budžeta, tačnije uvrste se kompletno nova/dodatna sredstva, u ovom slučaju 15.000 KM?

17. Ekonomski kod, rekonstrukcija puta u MZ Malešići (povećanje budžetske stavke za 10.000 KM, sa 20.000 KM na 30.000 KM, uz učešće građana 30.000 KM); Rekonstrukcija puta u MZ Vranovići (povećanje budžetske stavke za 29.035 KM, sa 30.000 KM na 59.035 KM, uz učešće građana 29.200 KM); rekonstrukcija puteva u Doborovcima (smanjenje budžetske stavke za 8.000 KM, sa 30.000 KM na 22.000 KM, uz učešće građana 21.000 KM. Ne koriste se isti aršini za sve. U prva dva slučaja se namiruju znatno veća sredstva za dovršetak projekta rekonstrukcije puteva u MZ Malešići i MZ Vranovići, uvažavajući i učešće/grant građana, ali kod MZ Doborovci građani su većim dijelom svojim novcima uticali na manje povlačenje sredstava koja su im budžetom planirana (umjesto 30.000 KM, iz budžeta korišteno 22.000) KM.

18. Ekonomski kod 821612, Rekonstrukcija puta Koplje-Čalići-Brezje, planirano 10.000 KM, rebalansom umanjeno na 5.000 KM.

Zašto umanjene navedene stavke, ako je stanje navedene dionice veoma loše, gdje bi se za 10.000 KM planiranih budžetom, izvršilo kvalitetno nasipanje sanacije ove dionice za nesmetan saobraćaj i povezivanje dvije mjesne zajednice, posebno ako uzmemo u obzir i da je ovo povezni put prema izletištu Vis iz MZ Malešići?

Na kraju samo dvije konstatacije. Ovdje ću se dotaći jedne pohvalne situacije, pohvalne radnje gdje naš vijećnik sada Federalni poslanik.

Pohvalna je činjenica da općinski vijećnik Rahim Gadžić, svojim angažmanom obezbijedi znatna sredstva za svoju MZ u iznosu od 116.150 KM, po osnovu granta višeg nivoa, ali da li to automatski utiče da se ostali grantovi koji su planirani prema općini umanje i time se dovede u pitanje realizacija više projekata planiranih budžetom, koji ovise od grantova viših nivoa? Jeste pohvalno ali nije dobro da se zaobilazi Općina i Općinski načelnik.

Na kraju samo konstatacija:

- Smanjenje bruto plata je u apsolutnom iznosu od 45.800,00 KM. Analizirajući strukturu, odnosno kretanje plata po službama to je:

1. POVEĆANJE BRUTO PLAĆA PO SLUŽBAMA:

- Općinsko pravobranilaštvo	866,00
- Stručna služba vijeća	2.466,00
- Kabinet općinskog načelnika	29.946,00
- Služba za upravu, društvene djelatnosti.....	50.272,00
- Služba za civilnu zaštitu	32.705,00

=====

116.255,00

2. SMANJENJE BRUTO PLATE PO SLUŽBAMA:

- Služba za poduzetništvo, lokalni razvoj.....	4.829,00
- Služba za prostorno uređenje, geodetske i imovinsko pravne poslove	124.799,00
- Služba za reviziju koja nije ni formirana	31.888,00

=====

161.516,00

APSOLUTNA RAZLIKA = 45.261,00 KM, a ne 45.800,00 KM i mislim da ovde nije smanjenje plaća, jeste u apsolutnom iznosu i mislim da nam trebate sugerisati zašto su ovakva istupanja. Da li je to greška do projekcije u budžetu ili nešto drugo. Stoji ovo što ste iznijeli ali jako su velike oscilacije u službama, za što i službe i vi sami trebate da obratite pažnju. Hvala“.

Hasić Ibrahim:

„Evo ja bih se zahvalio kolegi Šehiću, pored mojih vijećnika iz Malešića da on jedini vodi brigu o Malešićima, a ovi iz Malešića spavaju. Hvala ti na tome. Ali pošto si ti iz Malešića vreće izašao da tako kažem, trebaš navratiti u Malešiće pa i na kompleks Čalići-Brezje da dođeš i vidiš da je Ibrahim Hasić Predsjednik Vijeća MZ Malešići od asvalta do asvalta posuo put, razgrnuo i uvaljao“.

Smajlović Vahidin:

„Vezano za Odluku o izmjenama i dopunama budžeta općine Gračanica za 2018.godinu evidentno je da ima određenih preusmjerenja, naravno što je u nadležnosti načelnika. Ono što je bitno jeste da imamo povećane prihode od indirektnih poreza. Ali uzimajući u obzir strukturu, ustvari koliko u strukturi ukupno učestvuju ti porezi, sa nekih 65,66 % jako je bitno. To je dobro, da i općine prilikom planiranja budžeta, svake godine imamo sve veće i veće prihode i to nam daje da kažem, jednu sigurnost i za realizaciju, a i za planiranje budžeta za naredne godine. Nadamo se da će s viših nivoa biti više realizovano, bar ono što smo planirali. Na žalost evidentno je da grantovi sa kantona su izostali, a vjeroovatno na to je uticala i promjena Vlade TK, zatim izborna je godina, ali evo nadam se da će biti bolje za planiranje grantova za naredni period. Klub SDP-a će podržati ovaj rebalans budžeta, naravno sa našim zahtjevom da ovi projekti koji nisu realizovani u ovoj godini, da se oni dovrše i da oni koji budu preneseni u narednoj godini budu prvi na listi za realizaciju i izvršavanje. Nadam se da će ovakav trend priliva nastaviti se i do kraja godine i da ćemo u konačnici doći do pozitivnog izvršenja budžeta za 2018.godinu“.

Almedin Devedžić:

„Kad je u pitanju Odluka o izmjenama i dopunama budžeta Općini gračanica za 2018.godinu Klub vijećnika SDA je istu razmatrao i vodeći se ranijim odlukama mi smo podržali ovaj budžet našom politikom da svaka MZ mora imati bar nešto u budžetu i da ne smije biti nula. Imajući u vidu situaciju koja je egzistirala u ovoj godini konstatovali smo da ima dosta stvari, za koje SDA izražava žaljenje što se nisu realizovali i po svemu sudeći i neće, a radi se o projektima. Takođe želimo da izrazimo i zadovoljstvo što se kružni tok radi, ali generalno žaljenje je što sredstva koja su planirana sa nivoa kantona nisu realizovana onako kako je planirano. Takođe, rebalansom ćemo započeti na radost MZ-a, od elementarnih nepogoda krenuti na rekonstrukciju MONJ-a, tako da će i stanovnici Džakula, Doborovaca, Trnovaca, Buk-a, Prijekog Brda naravno odahnuti i ovu zimu prevazići, na tom dijelu. Takođe nam je žao što ovaj put u Stjepan Polju, Grič-Polje, nije realizovan. Naravno nadamo se da će načelnik svojim aktivnostima i to ispoštovati. U principu vijećnici SDA će podržati ovu Odluku izmjenama i dopunama budžeta Općine Gračanica za 2018.godinu“.

Mirela Trepanić:

„Naša stranka je takođe razmatrala Izvještaj o rebalansu budžeta, odnosno Odluku o izmjenama i dopunama budžeta za 2018.godinu i smatramo da ima dobrih promjena, ali se slažemo sa vijećnikom Šehićem za većinu stvari koje je postavio kao pitanje, kao nedoumicu i bit ćemo sretni da čujemo Vaš odgovor i pojašnjenje. S druge strane na žalost, mi nećemo podržati ovaj rebalans, iz razloga što još uvijek nismo dobili izvještaj, analitiku utroška sredstava sportskim klubovima iako sada vidimo to je i povećano za 10.000 KM. I podržavamo tu Odluku da se poveća, ali izgleda da će se svaki sportski klub meni obratiti i pitati zašto nismo dobili sredstva, a vama neće. Pa evo npr. nedavno Košarkaški klub Gračanica je rekao da nije uplaćena ni jedna marka iz ovog budžeta. Možda su sad mene slagali, možda Vi imate tu informaciju? Zato bih ja voljela da vidim tu analitiku“.

Senahid Džebo:

„Ja sam prvobitno mislio da se ne javljam. U jednom od vijećničkih pitanja, zbilja kad čovjek radi na terenu zbilja se osjeća nekad i prozvanim i prolazi kroz takve stvari. Kolega Ibrišević je ovdje navodio da smo mi tamo u realizaciji dionice 1, dionice 2 puta Grič kao obavezna sredstva 13.500,00 javno ovdje, ja sam vodio taj projekat, radili smo u tome. Uplaćeno je 32.000 KM sredstava građana za izgradnju tog puta. I to se nalazi na računu u Opštini i tu su sredstva građana i nisu otišla nigdje drugo. I meni je isto žao što ovaj put nije realizovan, nije urađen. Imao sam tu jednu primjedbu, uvažavajući ovaj rebalans, uvažavajući

sav rad koji se radi na terenu uz povećanje ovih cijena i mislio sam da iznesem tu primjedbu, međutim uz čvrsto obećanje načelnika a i javno se izjasnio da će ići u proceduru i ova dionica 1, te se nadam da će se i ona realizovati“.

Čamdžić Mirsad:

„Mirela je uglavnom kazala naš stav kad je u pitanju rebalans budžeta. Ja moram priznati da nemam tu vrstu ekonomskog znanja, ali vođen nekim zdravim razumom, hoću sa ove govornice da utvrdim da kako sam vijećnik, nisam imao priliku čuti bolju analizu, kritiku da kažem, nego što je to uradio kolega Šehić. Ne ulazim i ne dajem nikakve vrijednosne sudove o onome što je iznio, ali svaka čast na posvjećenosti ovom poslu. Ja bih samo još jednu možda i političku klasifikaciju na izvršenje ovog budžeta. Naime, u javnosti je stvoren, posebno među penzionerskom populacijom jedna vrsta odijuma o odluci da se sredstva iz budžeta namijenjena na penzionerima dijele dvanaest sati prije predizborne šutnje. Čak, predsjednik Udruženja penzionera Faruk Delić dolazio je u Radio Gračanicu da, ne znam čime je bio izazvan, možda reakcijom građana, da kaže kako ta odluka nije povezana, nedaj bože s izborima, da to nema veze s tim, da se eventualno neki glasovi možda omekšavaju na takav način, pa bih ja predložio da se u budućnosti izbjegne implementacija ove Odluke u ove dane, oktobar svake druge godine, nego da se to premjesti u prva tri-četiri mjeseca kalendarske godine, kako bi izbjegli ove nesuglasice. Još jednom pominjem veliki odijum kod penzionerske javnosti izazvala je ova Odluka. Bilo je dosta kritika i oni koji su pratili reakcije po društvenim mrežama, svjedoci su tome. Dakle, to je jedna vrsta sugestije, da bi smo izbjegli sve te eventualne špekulacije i tvrdnje koje su manje-više opravdane. Da se ta praksa prebaci u prva tri-četiri mjeseca kalendarske godine i da se izbjegnju ovakve tvrdnje“.

Odgovore na primjedbe i sugestije dao je Općinski načelnik Nusret Helić:

„Uglavnom Šehić je stavio najviše primjedbi i tražio objašnjenja. Sve je jasnije i generalno kad su u pitanju izvršenje budžeta, rađeno je u momentu na bazi poznatog, onog što je uknjiženo. Bili su i godišnji odmori i nismo mogli sve imati uknjiženo i zbog toga je na nekim stavkama došlo do nedoumice otkud sad povećava se stavka, za osam mjeseci nije izvršena ni 50 %. Evo da krenemo redom:

Video nadzor je povećana stavka za 2.000 na bazi završenog javnog poziva. Video nadzor se radi i bit će do kraja godine završen. Kad smo proveli proceduru došlo se do ovog iznosa, tako da je tu jasno.

Horizontalna i vertikalna signalizacija u tom momentu je bila u izvršenju ovakva, a sjećate se bilo je i pitanja npr. u Stjepan Polju i još nešto i izvršenje je sada na negdje od oko 50 % i preuzeli smo iz vaših pitanja u sklopu onih dvadeset završimo. To su prije svega nabavka znakova i ono ide nešto sporije i izvršit ćemo stavku od prilike onoliko kako je i planirana.

Urbanističko građevinska inspekcija, znate šta, onih 10.000 je predviđeno da firma koja radi izvršenja rješenja, uklopi se u taj iznos. Mi smo za to raspisivali oglas dva puta. Jednom smo izabrali i nakon izbora izvođač Gramat je odustao odmah. Ne možemo izabrati izvođača koji će izvršiti rješenje. Dakle, znamo da do kraja godine neće biti realizovano, zbog čega smo skinuli tu stavku. Na žalost, to je jedan veći problem, imamo par rješenja i na kraju ćemo možda morati natjerati „Komus“ da on bude neko ko će izvršavati rješenja inspekcije, ali je skinuto jer se neće realizovati do kraja godine.

WEB stranica, što je manja? I tu smo imali direktni sporazum. 1.200 to sve košta, prikupljali smo podatke i bit će realizovana do kraja mjeseca. Ja vjerujem tako da ćemo imati WEB stranicu.

Komisije. Mi za komisije Vijeća, a i komisije za tehnički pregled koje najviše koštaju. I tu je izvršenje u avgustu bilo najveće. Povećano je jer je daleko više predmeta i daleko su veće obaveze vanjskih članova komisije. I sad kad izvršimo, ostat ćemo prema nekim

komisijama, prije svega prema Komisiji za tehnički pregled, zato što nismo nikad planirali pravi iznos u budžetu.

Klizalište. Mi smo za klizalište krenuli u budžetu sa 40.000 i ušli u proceduru, a nismo planirali za ono što nam neko treba da pripremi igralište. Planirali smo više da dobijemo od ulaznica, pa smo to razbacali na nekoliko stavki. Ovo sad što smo povećali za 11.000, mi smo uklopili dosadašnje troškove 50.000, a 11.000 očekujemo da ćemo utrošiti do kraja godine za neke potrebne stvari. E sad na vama je, da vidimo hoćemo li mi to klizalište i dalje. To sigurno nikada neće biti ekonomski opravdano u smislu da ćemo imati prihoda, koliko i rashoda. Evo na vama je da se svi izjasnimo u vezi s tim.

Turistička zajednica, mislim da ćemo dobiti odobrenje sad od kantona i mislimo da će nam trebati sredstva do kraja godine i zato smo ih ostavili.

Sportski savez, takođe isto. Izvršenje je daleko veće nego što je ovdje. To su oni svi projekti koje su oni dobili. I ta stavka će se sigurno izvršiti do kraja.

Dječije obdanište, zašto 5.000? Rekli ste produženi boravak, mi moramo u skladu sa zakonom finansirati osnovno, plate, troškove itd. Možemo reći hoćemo toliko za toliko djece, ali evo pojavio se problem kako prevazići sad kad su puna obdaništa, a ima ljudi koji čekaju na to. Oni su tražili, a mi smo rekli ovo ćemo premostiti sa ovo malo para, a kad bude Ivještaj o radu dječijeg obdaništa, mi možemo to skinuti totalno i reći izvolite organizujte to na privatna način. Ali ono sada i funkcioniše bolje nego što jeste i prvi put je puno i traže da otvorimo još jedno odjeljenje. Za njega treba još negdje oko 25.000 jer imaju potrebe. A sada ide pitanje jesu li ekonomske cijene, da ne kažem da sad čuvamo i finansiramo djecu bogatih ljudi ili možemo mijenjati kriterije. U tome ima prostora.

Imali smo kapitalni projekat za vjerske objekte, imali smo grant. Ove dvije hiljade smo dali u Banja Luci za džamiju, pa smo smatrali da to stavimo kao novu stavku jer nismo imali tekuće, nije izgradnja nego za neke aktivnosti.

Škrahovica 2.000. Imali smo problem klizišta i ne možete sanirati klizište Avdići, parcela je tuđa. Čovjek je rekao samo pod uslovom da uzmete tu parcelu, odnosno MZ-a da bi mogli sanirati klizište.

I MZ je uzela tu parcelu da bi sanirali i to je tih novih 2.000 KM.

Čalići-Brezje. Mi smo imali Odluku MZ da usmjeravamo asvaltiranje tih 10.000 KM s druge strane, a ovo smo ostavili pošto je i bilo potrebno. Evo Mešić je tu da posipamo, naspemo, saniramo i ostavili smo tu 5.000. Zato je onih 10.000 iz budžeta otišlo u Malešiće.

Lukavica vodovod. Znaete da imamo problema i 70.000 je iz kredita, kredita kojeg smo digli ima već 3 - 4 godine. I za njih će se sad raditi bazen. A onih 40.000 smo tražili, grant iz kantona, vodnih naknada, nismo dobili jer je bilo potrebe da pravimo možda veći bazen. Na žalost još nemamo vode do tog bazena i to se zna odakle može. Nadam se da će ove nove vlasti imati gore malo više sluha da riješimo pitanje Lukavice sa vodosnabdijevanjem.

Babići, mi smo planirali iz kantonalnih grantova 40.000 za komplet kanalizaciju. Ušli smo, raspisali kasno, proveli proceduru a onda dobivamo odluku na 25.000 potpisujemo ugovor, a to je jedna cjelovita dionica koja zahtijeva i kanalizaciju.

Sportska dvorana, mi mislimo da ćemo za ova naša sredstva ući u nekakve procedure tamo da probamo uraditi bar neke instalacije. Poznato je da je propala Odluka Vlade, a ova druga to nije prihvatila.

Malešići, Vranovići, zašto više? Kad smo raspisali javni poziv za put koji je planiran onda se pojavi da je on toliko para, građani u međuvremenu skupe još para, fali 10.000 da bi završili tu čitavu dionicu i logično je da se traži način i da će se predložiti. Ovaj put nije riješen. Vranovići idu sad raspisana je procedura i da bi završili kao jednu cjelinu. Tako i za Malešiće, ljudi su skupili određen dio sredstava i kad vi raspisete javni poziv i u javnoj nabavci to ispadne deset, petnaest hiljada više, šta će se drugo raditi, nego napraviti rebalans i pokušati planirati gdje i šta možemo.

Plate su jednostavno po tome, gdje su službe i vjerovatno smo pogriješili tu nikakvih povećanja plata nije bilo sem onog što je osnovica 305,00 KM i informisani ste. ništa se drugo nije desilo. Imate u službama određen broj ljudi, vezan za kabinet ili neku drugu službu dok se ne popune.

Energetska efikasnost. Mi smo planirali da ćemo dobiti sredstva, nismo znali ni koja je zgrada, jer smo prošle godine dobili za jedan projekat. Na žalost ove godine taj projekat od UNDP-a nije odobren. Ove godine smo planirali to na bazi da ne kažem poznatih donatora. Nama kažu, treba nam jedan projekat koji je tolike vrijednosti. I logično građani ove dole zgrade Luke su pokazali interes, prikupili pare, ja otišao na sastanak i rekao im. Logično je da ćemo probati naći mogućnost u sanaciji krova. Samo da vas podsjetim, kad smo preuzeli SIZ stanovanja, sva su sredstva legla na račun Opštine. Utrošena su za neke namjene. Logično je ako imate mogućnost da pomognete. Jeste to sad privatna imovina, ali je devastirano u ratu i mi jednu po jednu zgradu rješavamo. Pomoći ćemo i gore na Bazenu, ima sad i odavde inicijativa i logično je da iz budžetske rezerve pomognete sa par hiljada, jer dole su uglavnom kako sam vidio penzioneri. I oni moraju za utopljavanje skupiti negdje tridesetak hiljada i mi, ja nađem donatora. Nema se sad vremena, da se arspiše, pa da kaže više je novaca, nego što imate.

Neću više ići na sastanke, ako vama ne odgovara da načelnik sa građanima ne razgovara o svakoj temi, pa kaže tamo, nije načelnikovo da pomaže građanima.

Svaka vlast treba to da radi. Dakle, ovo su grant sredstva koja ja očekujem da dobijemo od donatora za tu zgradu. Ako nema od donatora za tu zgradu. Ako ne dobijemo, nema od toga ništa.

Evo oko penzionera, nemojte biti takvi, nema to veze sa izborima. Vi ste zajedno ovdje, ja predložio, vi odobrili da svake godine penzioneri imaju dvadeset, dvadeset pet i da ćemo pomicati to i oni uvijek u skladu sa kriterijima, dijele u oktobru mjesecu, pred njihovu svečanu sjednicu. Nema veze sa izborima, kakve veze sad izbori imaju?

Logično je da dođu načelniku, da im to čestita jer načelnik predstavlja Općinu. Sa izborima vjerujte, nema veze, a uvijek će se neko naći za reći tako nešto. Dakle, ljudi to najčasnije podijele i ja mislim da niko ne opravda bolje sredstva, imaju kriterije, podijele po svojim mjesnim organizacijama. Tad se dijeli isključivo zato što je to pred taj njihov Dan penzionera. Nikakve veze nema sa penzionerima.

Mirela, svaki klub, svake sedmice, sutra ili prekosutra dobiva određena utvrđena sredstva. Ako te interesuje za Košarkaški klub svake sedmice dobiju 250 ili 300 maraka za nužne troškove. Tako njima i tako odprilike dobiju svi nižerazredni klubovi. Nešto više dobiva Kaskada, dobiva II liga Federacije, Miričina, Malešići, dobiva Bratstvo, Rukometni klub, ima tranša utvrđena. Dobiva svaki mjesec iz budžeta Rukometni klub 6.000 KM. Dakle, sve je jasno i u skladu sa Odlukom. Nije tačno, niko nije došao načelniku i rekao nema, žalio se. Ima Odluka i imaju kriteriji. Doći će vrijeme da će nestati, sve je manje sponzora. Da nema ovoga, pola klubova bi se ugasilo. To je to, a znate to i vi. Može se reći pola ćemo smanjiti ali vjerujte da nema donatora kao nekad kad je bilo. Ljudi se povukli u sebe. Evo to je to. Nismo promašili ni jednu stavku, vjerujte“.

Odluka o izmjenama i dopunama budžeta Općine Gračanica za 2018. godinu je usvojena sa 26 glasova „ZA“ i 4 „PROTIV“.

TAČKA 3

RAZMATRANJE I USVAJANJE NACRTA BUDŽETA OPĆINE GRAČANICA ZA 2019. GODINU.

Obrazloženje po ovoj tački dnevnog reda dao je Općinski načelnik Nusret Helić:

„Evo nas kod prve projekcije budžeta, nacrta budžeta za 2019. godinu u roku na koji nas obavezuje Zakon o budžetima u Federaciji BiH.

Čime smo se rukovodili u kreiranju nacrta budžeta:

-Prvo i najvažnije smjernicama i ciljevima fiskalne politike koju nam je dostavilo Ministarstvo finansija TK, zatim ostvarenje prihoda za 2017. godinu, prvu polovinu 2018. godine, poslednje poznato izvršenje 2018., zahtjevima koje su dostavile službe,

dokumentom okvirnog budžeta 2019. i 2021.godina, Planom kapitalnih investicija, te potrebama za efikasno funkcionisanje službi i Vijeća.

Prema nacrtu planiran je budžet u iznosu od 12.744.034 KM, a sastoji se od:

- prihoda 12.644.034 KM,
- primitaka 100.000 KM,
- otplata 291.700 KM,
- izdataka 12.452.334 KM.

Porezni prihodi planirani su u iznosu od 7.848.771 KM i čine 61,66 % ukupnih prihoda i primitaka. U okviru ovih prihoda najveće učešće imaju indirektni porezi i to: 67,57 %, a u okviru njih porez od PDV-a 41,61 % i porez na dohodak 12,57 %.

Neporezni prihodi planirani su u iznosu 2.682.670 KM ili 21,05 %, a grantovi 1.112.593, što čini 16,58 % ukupnih prihoda i primitaka.

U skladu sa Zakonom o budžetima, u Federaciji BiH i parametara u nacrtu zatražili smo mišljenje Ministarstva za finansije TK da li smo postupili u skladu sa članom 33. stav 2. i članom 43. Zakonom o budžetima u Federaciji BiH, kada su u pitanju planirani prihodi i primitci i tekući bilans, te da li smo primjenili Plan prihoda i rashoda iskazan u projekciji Federalnog i Kantonalnog Ministarstva finansija.

Dobili smo pozitivno mišljenje Ministarstva finansija u kome se potvrđuje da su planirani prihodi i primitci i planirani tekući bilans iskazani u našem Nacrtu budžeta usklađeni sa članom 33. stav 2. i članom 43. zakona o budžetima u Federaciji i da je Općina primjenila plan prihoda iskazan u projekciji Federalnog i Kantonalnog Ministarstva finansija.

Ovo je bitno da znate i da prilikom odgovarajućih rasprava o nacrtu budžeta, vodite računa da nema dodatnog povećanja poreznih prihoda. Izuzetak je ako bi u međuvremenu došle nove projekcije od Ministarstva finansija TK.

Kako je koja vrsta prihoda planirana vidjeli ste iz dostavljenog nacrta i obrazloženja uz nacrt, te nema potrebe za dodatna pojašnjenja.

Iz pregleda izdataka takođe ste vidjeli na što se odnose.

Izdaci su planirani u iznosu od 12.744.034 KM, što je u odnosu na 2017.godinu, više za 16,94 %, a planirani su na bazi izvršenja prethodnih godina, ukazanih potreba i procjena.

Za tekuće izdatke planirano je 9.106.388 KM ili 71,46 %, kapitalne izdatke 3.345.946 KM ili 26,25 % i otplatu duga po zaduženju 291.700 KM ili 2,29 %.

Na šta se odnose tekući izdaci:

- Plaće i naknade zaposlenih i vijećnika 3.206,00 KM ili 25,16 %, što je dosta realno i racionalno u odnosu na ukupan budžet, **materijalne troškove u iznosu 2.992.352** ili 23,48 %. Najmanji su troškovi za službe i Vijeće, a ostali se odnose na komunalne usluge, zimsku službu, održavanje ulica, puteva, javne rasvjete, video nadzor, sajam, deminiranje i drugo, **tekući grantovi su planirani u iznosu od 2.422.036 KM** ili 19,01 %, a odnose se na grantove vanjskim korisnicima BKC, Centar za socijalni rad, Dječije obdanište, izbornu komisiju, stipendiranje učenika i studenata, sport, grantove MZ, nevladine organizacije, projekte mladih, kulturu, narodna kuhinja, podsticaji u poljoprivredi i drugo, tekuća rezerva je planirana u iznosu od 180.000 KM ili 1,41 % sa napomenom da je moguće planirati tekuću rezervu do 3 %.

Za kapitalne izdatke, planirano je 3.345.946 KM ili 26,25 %, a najveći dio ovih sredstava ide na kapitalne projekte 2.405.046 ili 18,87 % (za puteve oko 870.000 KM, vodosnabdijevanje i kanalizacije oko 900.000, regulaciju Sokoluše 300.000 KM).

Za otplatu anuiteta prema zaduženju, planirano je 291.700 KM ili 2,29 %. U tekstu Nacrta došlo je do greške i to na stranici 4 – ekonomski kod 614.311 pozicija 7 grant za klubove umjesto cifre 430.000 KM, treba da stoji 410.000 KM. Takođe na ekonomskom kodu 821.600 pozicija 15 – Putevi u Donjoj Orahovici treba da stoji 40.000 KM umjesto 30.000 KM i iza budžetske stavke vodosnabdijevanje u Rašljevi treba da stoji nova stavka – Putevi u Rašljevi 10.000 KM. U obrazloženju nacrta, to je ispravljeno. Dakle smanjeni su tekući izdaci za 15.000, a povećani kapitalni za isti iznos i zbog toga treba ispraviti u članu 1. Nacrta Odluke za taj iznos.

Ovo je nacrt, prva verzija budžeta planirana na dosta realnim osnovama. Sa grantovima smo bili dosta oprezni i planirali ih na nekim trenutnim pokazateljima, nadajući se da će se uspostaviti vlast na Kantonu i Federaciji koja će realnije raspoređivati sredstva i da će Gračanica dobiti više namjenskih sredstava.

Predlažem da usvojite nacrt i stavite isti na javnu raspravu do 5. decembra koju bi organizovala Služba za poduzetništvo, lokalni razvoj i finansije, a nakon toga pripremiti budžet“.

Učesnici u diskusiji su:

Osman Sulejmanović u ime Komisije za budžet iznio je slijedeće:

„Komisija je razmatrala Nacrt budžeta Općine Gračanica za 2019.godinu i konstatovala da je budžet ovakav, kakav je, prenizak je za Općinu Gračanica, za naše potrebe koje imamo.

Komisija predlaže da se ekonomski kod 614 300 transfer neprofitnim organizacijama smanji, a da se sredstva prebace na 614 500, to je stavka zapošljavanje mladih. Isto tako predlaže da se povećaju sredstva za kulturu, kao i da se ovakav Nacrt budžeta usvoji i da na javnu raspravu“.

Alen Ibrišević:

„Nacrt budžeta je dobra polazna osnova i Klub Nezavisni blok će pokušati amandmanski djelovati kako bi neke projekte uvrstili u budžet za 2019.godinu.

Ja imam nekoliko pitanja vezano za ovaj Nacrt budžeta. Prvo pitanje vezano je za famozni put Grič u Stjepan Polju. Ovdje je planirano 77.000 za taj put. Ostalo je da se uradi dionica 1, a po predračunu kojeg je uradila firma Roding. Ta dionica košta 67.000 a ne 77.000, tako da su po meni ova sredstva previsoka i molim načelnika da mi odgovori. Dalje, ova stavka za taj put 70.000 planirano je iz granta. U toku predhodne godine, kad god smo ja i Edin kolega postavljali pitanje vezano za ovaj put, odgovor je bio, čekamo sredstva iz kantona. Kako ja vidim, ponovo su planirana ta sredstva iz kantona i koja vjerovatno neće biti ponovo realizovana. Ponovo je planiran grant, a mene interesuje zašto nisu planirana sredstva iz budžeta?

Dalje, rekonstrukcija puta Malešići-Stjepan Polje planirano je u iznosu od 40.000 KM. U predhodnoj diskusiji o rebalansu budžeta govorili ste da je ona dionica koja je već urađena koštala 67.000. Ostala je potpuno identična dionica, potpuno ista dužina, tako da razjasnimo da li ćemo raditi kompletnu dionicu ili da se uradi onoliko koliko ima para?

I treća stavka, naime tamo, održavanje protivgradne zaštite planirano je u iznosu od 5.000, a nisam nigdje vidio da je planirana stavka izgradnja protivgradne zaštite. Nadam se da će biti realizovana u ovoj godini, barem tako vidim iz budžeta. To je sve“.

Edin Šehić:

„Ovo je radna verzija i mi ćemo naravno u sklopu javne rasprave, pošto imamo rok, dostaviti svoje određene prijedloge, primjedbe i sugestije. Ono što bih ja volio da načelnik na ovoj sjednici odgovori jeste par pitanja koja ću postaviti.

Ekonomski kod 611 225 - Otpremnine u iznosu od 45.000. Znatno je veći iznos u odnosu na prošlu godinu pa pitam koji uposlenici se penzionišu iduće godine?

Ekonomski kod 613 324 – Komunalno održavanje zimska služba u iznosu od 200.000 KM. Iz godine u godinu imamo istu situaciju, planiramo nekih dvjesto, dvjestodvadeset hiljada, rebalansom povećavamo za osamdeset hiljada. Zašto nismo bili odvažni i odmah rekli da tu bude dvjestošezdeset, dvjestosedamdeset da ne podizemo stalno tu skaluu. Dakle, mislim da u prijedlogu treba da ide veća suma za zimsko održavanje, s obzirom da iz godine u godinu povećavamo.

Ovo je vjerovatno greška, ali obzirom da sam razmatrao, vjerovatno prilikom copy-paste ekonomski kod 613 711 – Izdaci za održavanje zgrade taksativno su nabrojani trideset i pet, a onda je u ukupan iznos stavljeno 35.000 iznos pa evo da se koriguje.

Transfer za Dječije obdanište „Naša djeca“, transfer za Centar za socijalni rad povećani su za 10.000 u odnosu na budžet 2018., kao i nova stavka transfer BKC-u od 50.000 pretpostavljam da su namjene dobre s obzirom da se sva dešavanja vode u BKC-u i finansiraju. Ali evo da načelnik malo obrazloži zašto imamo povećanje. To je u suštini 5.000 za „Naša djeca“ u odnosu na rebalans, ali deset u odnosu na budžet. Da li to još 5.000 dajemo za produženi boravak i centar za socijalni rad, zašto je povećanje 10.000 u odnosu na budžet 2018. godine.

Samo ću se još jednom nadovezati vezano za energetska efikasnost. Dakle, nije sporno da to bude određena zgrada da su se javili donatori, možda bi se poštedili načelnice nekih komentara, da se javno kaže i niko ne bi oprostio, ali da se omogući apliciranje na to. Ako neko obezbijedi 25.000 i mi ćemo toliko, ali mora se transparentno izaći sa istinom u javnost.

Sada, samo na kraju, jedan prijedlog svima nama. Mi smo to i iznosili, Klub stranke za BiH i protekle godine pred usvajanje budžeta, jednostavno podižući rejting i djelovanje MZ-a kao najviših lokalnih da kažem institucija naše lokalne sredine, da pokušamo u prijedlog budžeta staviti po nekim kriterijima evo možda nisu bolji kriteriji za raspodjelu tih sredstava, koji se daju za redovno finansiranje MZ-a. U nekim kriterijima redovno da određena, da ima sto, dvjesto, tristo hiljada za kapitalne projekte, a da je ona dužna evo možda do aprila mjeseca, obzirom da se nikad ranije ne raspisuju javni pozivi, da je vijeće MZ dužno dostaviti predračune za koje projekte želi realizirati. U sklopu tog granta, odnosno tih sredstava koja su obezbijedena u budžetu. Mislim da je to bliže građanima šta žele rješavati u svojim MZ-a. Mislim da je to dosta transparentnije i da ćemo ravnomjerno razvijati sve MZ na području općine Gračanica, a ovako, da se ne prozivamo, jer to ne želim, svi ste svjesni da pojedine MZ su dugo u budžetu a neke MZ to nisu već duži niz godina. Želim da o ovome razmislite, možda je kasno za ovaj budžet, a možda i nije, ali za u buduće da ide ništa se nebi remetilo samo bi Vijeća MZ imala veće ovlasti i odgovornosti, a u suštini procedure su iste, provodila bi ih općina“.

Demir Milkić:

„Evo nacrt je došao na vrijeme i mi imamo vremena da u toku javne rasprave uzmemo učešće i prijedlozima i primjedbama dođemo do kvalitetnog prijedloga budžeta Općine za 2019. godinu. Ja znam da svake godine se puno izdvaja za kapitalne projekte infrastrukture, vodosnabdijevanja i slično, ali želim da zamolim načelnika da ako ima mogućnosti planira u budžetu grant ili fond za biomedicinski potpomognutu oplodnju sa 10.000. Time bi smo za početak pomogli mladim bračnim parovima u vezi s tim. Državni zakon ne postoji, a kantonalni ima, ali je teško doći do tih sredstava“.

Vahidin Smajlović:

„Evo kao što reče Predsjednik Komisije za budžet, ni Komisija za budžet nije zadovoljna visinom budžeta i ja vjerujem da će tokom javne rasprave taj budžet, na osnovu prijedloga i sugestija koje će dostavljati MZ kao i drugi učesnici, taj budžet izaći na trinaest i po ili četrnaest miliona. Ja to vjerujem i na osnovu prihoda i svega, jer taj budžet u tom iznosu koliko toliko može zadovoljiti potrebe naše općine, uzimajući u vidu činjenicu da nastavimo ravnomjerno da zastupamo sve mjesne zajednice, a ne kao što kažu da neke mjesne zajednice dobivaju, a neke ne. Vezano za nacrt budžeta ja ću lično predložiti povećanje sredstava za rad Vijeća MZ-a bar još za po 1.000 KM. Prošle godine kada smo usvajali budžet za 2018. godinu tražio sam da se taj grant poveća za sve MZ po 1.000 KM da ide linearno po 2.000 KM za svaku mjesnu zajednicu. Evo ja ću to tražiti za mjesne zajednice jer zaista ta sredstva su mala, a znaju to oni koji rade u vijeću MZ-a. To dobro dođe jer imamo MZ-a koje nemaju nikakvog drugog prihoda sem tih sredstava koje dobiju kao grant od općine. Klub SDP-a će

podržati ovakav nacrt budžeta za 2019.godinu i vjerujem da ćemo tokom javne rasprave imati svoje prijedloge, mišljenje i naravno da ćemo u konačnici doći do budžeta koji zadovoljava interese i potrebe svih građana općine Gračanica“.

Džebo Senahid:

„Ja sam prošle godine kad smo kreirali nacrt budžeta za 2018.godinu, sugerisao što se tiče primjedbi na nacrt, da mi kao vijećnici, evo svi mi imamo nekakve svoje prijedloge, da više uvažavamo i poštujemo Vijeća MZ-a i njihove prioritete. Sva Vijeća MZ-a dostave šta su njihovi prioriteti, pogotovo one mjesne zajednice koje dostave odluke koje su usvojene jednoglasno. Pa ako treba da tu bude i potpis vijećnika u Vijeću MZ, a ne da se ovdje izjašnjavamo, da pojedini vijećnici uzimaju sebi za pravo i nekakve projekte predlažu, a na kraju građani ne žele čak ni da se skupe potrebna sredstva građana. Znači, treba da vodimo računa o tome šta će vijeće MZ predložiti kao prioritet i to usvojeni jednoglasno“.

Gadžić Rahim:

„Kad je u pitanju Nacrt budžeta, to je radni materijal pa bih ja iznio nekoliko prijedloga, šta bi trebalo da se nađe u budžetu za 2019.godinu. Mi znamo da je u Mjesnoj zajednici Trnovci započet društveni dom i trebalo bi ga u narednom periodu završiti tako da treba planirati sredstva u visini oko 20.000 KM da ga privedemo kraju. Kad je u pitanju MZ Džakule, ovdje imamo poteškoća oko izgradnje ambulante. Započeta ambulanta i da bi je priveli namjenu trebalo bi planirati sredstva u visini od 2.000. Tako bi pomogli svim pacijentima sa uslugama ambulante. Znamo da je u jako lošem stanju zgrada odnosno krov zgrade MZ Džakule, tako da bi i za to trebalo planirati sredstva takođe u visini oko 20.000 KM. U MZ Buk imamo put Ibrići koji nije dovršen i koji je u lošem stanju i trebali bi i za to planirati sredstva u visini oko 20.000 KM. Kad je u pitanju Donja Lohinja, most prema Šestanima treba planirati sa 10.000 jer se svakodnevno koristi od strane poljoprivrednika. I put Brana-Mehanovići u Donjoj Lohinji i odprilike oko 30.000 KM treba planirati. Jedina MZ na području općine Gračanica koja nema sportskog poligona je MZ Gornji Doborovci. Treba planirati sredstva da se taj poligon završi, kako bi u 2019.godini svaka mjesna zajednica imala poligon, a to je odprilike oko 20.000 KM. Kad je u pitanju Mjesna zajednica Doborovci mi svi znamo za jedno izletišta koje je na tom putu Monj. Put je u veoma lošem stanju prema izletištu Monj i trebali bi izvršiti sanaciju puta i u saradnji sa Turističkom zajednicom pokušati to izletišta staviti u funkciju svim građanima općine Gračanica i šire.

Evo vidimo da je i standard života sve skuplji, trebali bi u narednom periodu razmišljati kroz budžete da se vidi, da li kroz povećanje koeficijenata ili osnovice, ipak bi uposlenicima Općine trebali omogućiti povećanje plata, jer je životni standard poskupio.

Tako sve firme razmišljaju i kako želimo da pomognemo sektoru tražit ćemo da pomognemo i da načelnik razmisli da ako ikako postoji mogućnost da kroz koeficijente ili povećanje osnovice poveća plate uposlenicima Općine.

Zatim, mi svi koji radimo u mjesnim zajednicama imamo poteškoće kad je u pitanju održavanje puteva. Evo kad god prođemo vidimo da je pored svih puteva. Evo kad god prođemo vidimo da je pored svih puteva neokrčeno i zapušteno i trebali bi razmisliti o uvođenju putara koji bi to radili kao uposlenici, jer imamo katastrofalno stanje na terenu. Evo svi smo svjedoci jer smo prolazili kroz sve mjesne zajednice i rijetka je mjesna zajednica da ima očišćene puteve. Putevi su jako zapušteni jer svi mislimo da ako asfaltiramo put da smo završili i da više ništa nemamo raditi oko tog puta. To nije tačno. Putevi se trebaju održavati. Kad je u pitanju planiranje sredstava za rad mjesnih zajednica, ovo što Vahidin predlaže da bude linearlna po 1.000 KM podržavam.

I evo da se planiraju sredstva u iznosu od oko 6.000 KM u Sokolu, da se to razriješi. Ispred moje mjesne zajednice Prijeko Brdo vijeće Mjesne zajednice će uputiti pismene primjedbe. Nama je cilj da nastavimo graditi put kao i puteve kojih u ostali i bit će prijedlog za izgradnju asvaltnog puta u MZ Prijeko Brdo“.

Devedžić Almedin:

„Evo sigurno ovaj Nacrt budžeta je dobra polazna osnova za prioritete po lokalnim zajednicama. Ja bih zamolio načelnika da pokušamo kad se bude pravio konačni dokument da se uvažavaju primjedbe komisije vezano za neprofitne organizacije i da se povećaju sredstva za organizacije koje stvarno rade i koji aktivnostima u lokalnoj zajednici rješavaju određene probleme. Ja bih zamolio načelnika da pokušamo da završimo poligon, kako je dao obećanje u Mjesnoj zajednici Lukavica što nismo uspjeli ove godine. Nadam se da će biti u prioritetima Vijeća MZ Lukavica, određeni putni pravci u Lukavici koji nisu nikad asfaltirani kao što su Čamdžići-bijeli Potok. Isto tako imam i lični zahtjev u ime građana u Gračanici u ulici hermana, zatim i puteva koji se nastavljaju na to, a u stvari bit će prilike do konačnog dokumenta da o tome razgovaramo“.

Mujkić Mirsad:

„Klub SDA na svojoj sjednici je razmatrao Nacrt budžeta za 2019. godinu i stavlja smu da ćemo prihvatiti ovakav nacrt kakav jeste, naravno i pod uslovom da se prihvate svi amandmani, primjedbe i sugestije. znači sve ono što bude potrebno u konačnici za izradu ovog budžeta i koje će biti iznešene u samoj fazi razmatranja, a naravno koji će biti u domenu realnog za budžet“.

Odgovore na primjedbe, pitanja i sugestije dao je Općinski načelnik Nusret Helić:

„Bilo je evo nekoliko pitanja. Ovo vezano za otpremnine. Pet uposlenika sledeće godine ide u penziju, pa evo ako vas interesuje ko je: Ferid Ibrahimović, Amir Zejnilagić, Mevlida Naimkadić, Amira Ustavdić i Ajša Rešidbegović. Dakle u skladu sa zakonom to su sredstva koja pripadaju za otpremnine.

Ovo za obdanište, odnosno za Centar za socijalni rad, već nekoliko godina ima potrebe za primi pravnikom. Mi do sada nismo imali mogućnosti, da tako kažem da im odobrimo. Oni su čak jedne godine i smanjili sredstva, a ove godine za širenje djelatnosti koju traže i to je od prilike nešto manje od jednog uposlenika i oni se nadaju da će ovo uraditi i iz svojih sredstava.

Kad je u pitanju obdanište pričao sam već, ali ima i tamo potrebe za jednim novim odjeljenjem i oni će nešto iz ove cijene pokušati riješiti, tako da prime još jedan broj djece. Da znate na čekanju je kod njih sad blizu pedeset novih zainteresovanih za obdanište. Znao da je bio prijedlog skoro, da pokušamo i u Orahovici otvoriti obdanište, ali su to zaista značajna sredstva, ali evo imamo ovo obdanište, a i privatno pa nekoliko premoštavamo. Dakle, to su razlozi.

Što se tiče zgrade na Lukama, moja iskrena namjera je da odem i čim sam otišao i objavio da sam bio, transparentno je. Imao sam namjeru da kažem da ćemo pokušati pomoći građanima, ali evo izgleda da ne trebam javno iznositi svoje aktivnosti. A evo sada vidite, svi ste izašli ovdje i tražite nova sredstva. Vidjet će te kako će biti teško kreirati budžet. Nema prostora, sem ako vi nama ne donesete, ova nova vlast, odozgo grantove, a pogotovo za puteve. A iz Federacije čim dođu sredstva da mi pravimo put za Gadžića ili da završimo u Babićima, Stjepan Polju itd. Bit će dakle prilike, kad dođu primjedbe, sjedat ćemo kao i do sada, razgovarati, pokušati uraditi naprednije budžet.

Oko povećanja plaća, samo da kažem, mi smo planirali povećati osnovicu na 310. To je neznatno, ali svi u okruženju imaju osnovicu 315, Gradačac, Tuzla i drugi, ali postupno dostići ćemo“.

Nihad Krajinović:

„Evo ja ću samo ovo što je načelnik rekao za sebe, pa ima li zaista nekad potrebe da se čovjek samo reklamira, da to tako nazovem i da objavljuje sve o svojim aktivnostima. Sam se nekad pitam jeli to treba ili ne, jer to bude nekad da se ne prihvati dobronamjerno, pa spočitavaju. Ima nas nekoliko vijećnika koji imamo toliko aktivnosti, pa ne objavljujemo svaki svoj korak javno. Mislim da ako se vodi pregled zbivanja aktivnosti načelnika, da je to dobro, ne samo za nas, nego i za građane koji vole da se informišu o tome, gdje se načelnik kreće. I da se i sami uvjere da se i on kreće među građanima, a ne samo u ovim političkim krugovima. To sam htio samo da napomenem, za neke od kolega. Međutim, htio sam jednu sugestiju načelniku. Znam da treba da se držimo ovoga što je projicirano budžetom za 2019. godinu, ali moja sugestija bi bila. Kad je u pitanju grad Gračanica, znam i da će odgovor biti, to ćemo iz rente, da se uzme u obzir prijedlog koji bude došao iz MZ Gračanica.

Njima se obraćaju i građani i oni su sumirali neke prijedloge i sugestije. Da oni što predlože, da se pokuša uzeti kao prioritet tim svim aktivnostima za grad Gračanicu. A ja ću svoje lične prijedloge dostaviti u toku javne rasprave. Da se nađe način da se očisti korito rijeke Sokoluše na potezu od naselja Kotoruša do srednje škole u Gračanici jer nam je to prava divlja zona sa naslagama zemlje, kamenja i svega onog što je rijeka proteklih godina donosila. Pa eto smatram potrebnim da se to očisti i da se dalje korito rijeke ne upropaštava“.

Predsjedavajući Vijeća je definisao zaključak:

„Usvaja se Nacrt Budžeta Općine Gračanica za 2019. godinu.

Nacrt Budžeta Općine Gračanica stavlja se na javnu raspravu do 05. 12. 2018. godine.

Javnu raspravu će provesti Služba za poduzetništvo, lokalni razvoj i finansije u skladu sa Odlukom o javnim raspravama u Općini Gračanica („Sl. Glasnik Općine Gračanica“, broj: 5/04).

Sve primjedbe, prijedloge, dopune i sugestije se mogu dostaviti nadležnoj Službi za provođenje javne rasprave i Stručnoj službi Vijeća.

Zaključak stupa na snagu danom objavljivanja u „Službenom glasniku Općine Gračanica“.

Zaključak je usvojen jednoglasno sa 29 glasova „ZA“.

TAČKA 4

RAZMATRANJE I USVAJANJE NACRTA ODLUKE O NAČINU IZVRŠAVANJA BUDŽETA OPĆINE GRAČANICA ZA 2019. GODINU.

Nije bilo učesnika u diskusiji i Nacrt Odluke o načinu izvršavanja budžeta Općine Gračanica za 2019. godinu je usvojen jednoglasno.

TAČKA 5

RAZMATRANJE I USVAJANJE ODLUKE O PRODAJI NEKRETNINE.

Nije bilo učesnika u diskusiji i Odluka o prodaji nekretnine je usvojena jednoglasno.

TAČKA 6

INFORMACIJA O STANJU IZ OBLASTI VODOSNABDIJEVANJA NA PODRUČJU OPĆINE GRAČANICA.

Učesnici u diskusiji po ovoj tački dnevnog reda su:

Smajlović Vahidin:

„Evo imamo Informaciju o vodosnabdijevanju i ja u prvoj rečenici imam primjedbu jer stoji da je pitanje vodosnabdijevanja općine Gračanica riješeno putem gradskog vodovodnog sistema i dodao bih „djelimično“ riješeno putem gradskog vodovodnog sistema, jer tako na žalost izgleda. Pitanje vodovoda je riješeno u nekoliko mjesnih zajednica, kao i ovdje u gradu hvala bogu i Pribavi. Vezano za pitanje investiciono-tehničke dokumentacije kojih nema, takođe i o ovome moramo više voditi računa, jer evo svjedoci smo da u mnogim mjesnim zajednicama na žalost ti sistemi su jako zastarjeli, a nema nikakve ni projektne ni tehničke dokumentacije tako da imamo velike probleme oko sredstava. Radi se tu o sredstvima kantona gdje se za te grantove traži sva potrebna dokumentacija. Tako da pojedine MZ ne mogu realizovati projekat jer ta sredstva im nisu dostupna bez toga. Ovdje dolazi i do pitanja uloge i značaja našeg javnog preduzeća Gračanica. Znači koja je uloga u tome našeg javnog preduzeća, koja je uloga u pomoći i da kažem uloga u rješavanju pitanja vodosnabdijevanja u mjesnim zajednicama. Ono zaista dobro funkcioniše na području općine Gračanica i na području Mjesne zajednice Pribava, a evo i jedan dio Mjesne zajednice Škahovica, odnosno jedan broj građana te Mjesne zajednice imaju uslugu tog preduzeća i tu zaista nemamo problema. A šta je sa ostalim, jer to preduzeće će vodovode po mjesnim zajednicama uzeti na upravljanje u momentu kada sve to bude gotovo. Evo mi smo napravili i onda to uzima preduzeće, slažem se. Ali u mnogim mjesnim zajednicama pomoć ljudima, ne samo finansijska. Evo neka Mjesna zajednica u tom pogledu dobije grant, dvadeset, trideset i više hiljada, tim ljudima u mjesnim zajednicama treba onda stručna pomoć, kome bi se obratili. Jer zaista, evo ja, pa još neko obezbijedi sredstva kroz grant za neki projekat, onda to treba da pregleda neko stručno lice, pa se zato i desi možda da smo negdje fulili, jedva dobili pare a uzalud utrošili. Znači tamo u Nacrtu budžeta za 2019. godinu vidim u obrazloženju ima i potreba za prijemom novih radnika, pa su nabrojane razne struke, ali ja smatram da na nivou Općine treba da imamo i jednog stručnjaka za vodosnabdijevanje. To je jako važno pitanje. Znači hoću da iskažem potrebu, kako sada mi kada hoćemo da tražimo nekoga da nam radi neki projekat, da nam da jednostavno neko svoje mišljenje, možemo li otići u Vodovod i imaju li oni obavezu ustvari. Znam kaže se treba platiti. Platiti mogu one mjesne zajednice koje imaju sredstva, ali imaju one mjesne zajednice koje nemaju. Vidimo stvarno da je ovo važno pitanje i ja evo stvarno čestitam Mjesnoj zajednici Stjepan Polje, Soko i svima koje su riješile ovo pitanje. Vidimo i prihode koje su iskazale, finansijske, za 2017.godinu. Neke preko 120.000 KM, neke preko 60.000 KM. To su zaista ogromna sredstva i oni mogu nastaviti unapređivati to svoje pitanje. U tom dijelu ja smatram da bi trebala jedna ekipa na nivou općine stručna ekipa, čovjek koji je od struke i da se uradi jedna studija za MZ kako riješiti pitanje vodosnabdijevanja.

Ja za Mjesnu zajednicu Škahovica imam u Nacrtu budžeta 20.000 i ne znam šta da uradim sa tih 20.000. Mi ćemo uraditi, a možda ćemo i pogriješiti i zato trebamo imati nekog od struke. Toliko i hvala“.

Hasan Puškar:

„Ovdje sad dolazimo do onog što ja godinama tražim na što treba obratiti pažnju, a to je na Odluku o izvršavanju budžeta. Pod broj jedan ja nikad nikom ne bih dao banke iz budžeta dok se voda neda nekom pod upravljanje. Ili Mjesnoj zajednici ili preduzeću ili nekom. Tada će se početi i finansirati a kada se počne finansirati, počet će se i ulagati vezano za sredstva. Druga stvar, ne bih nikom dao sredstava, a to godinama radimo, prvo i osnovno je da se uradi projekat. Kad se uradi projekat idemo dio po dio. I kad se završi dio projekta, idemo dalje. Čim uradimo, počet ćemo naplaćivati usluge za potrošenu vodu. Gdje god nema troškova niko ne plaća vodu. Gdje god voda teče prirodnim padom svi su zadovoljni dok ima vode. Kad dođe suša, onda nastaje problem. Sad je jesen, počet će kiše i niko ništa neće pričati do mjeseca jula. Evo ja i dalje tvrdim, mi smo ovdje ti koji donosimo odluke, nas trideset. Evo hajmo mi donijeti odluku, da kažemo načelniku da neda tih para dok ne ispuni Odluku o izvršenju budžeta, sadašnji član 21. Odluke. Mi smo ti koji to možemo narediti, a

onda ćemo raspoređivati sredstva. Da se više ne troši po dvadeset, trideset hiljada. ove godine uložimo tristohiljada u Škahovici i riješimo vodu u Škahovici. Evo čist primjer su Vranovići, uložili smo oko pola miliona a ljudi nemaju vode. A znate li šta su radili? Jedan rezervoar, drugi rezervoar, a mrežu nisu razvili. Ljudi nemaju vode a uloženo je po miliona. Zašto? Zato što nisu planski išli u radu. Znači to je do nas, nas vijećnika. Hajde jednom da ispoštujemo to, jer mi stvarno trošimo pare džaba sve krenuli a ništa nismo završili. Na primjer uradili smo dio puta, a nismo mi vijećnici predvidjeli više, pa da se završi. Evo ja predlažem da održimo sjednicu o vodosnabdijevanju, pripremimo se i dovesti stručnjake. Deset, dvadeset i pedeset hiljada, nema ništa od ovoga. Jedan najmanji rezervoar košta 50.000 KM. Dogovorimo se i MZ po MZ, rješavati godinu po godinu. Hajde da riješimo one koji nemaju vode, ali hajmo završiti“.

Senahid Džebo:

„Stvarno je gorući problem vodosnabdijevanja na opštini Gračanica, a posebno u MZ koje nemaju vode. Podržavam Hasana, mi smo ti koji donosimo odluke. Mi smo ti koji sugerisemo kako treba raditi i šta treba raditi. Ja bih postavio pitanje službi koja je napravila ovu Informaciju i dostavila nam. Znači mi samo danas dobijemo informaciju i ništa ne usvajamo. Ja bih sugerisao na pojedine izvještaje MZ-a, da se kaže ko je dostavio te izvještaje iz MZ, ko upravlja tim vodovodima. Nemoguće je, a uzeo sam i pogledao samo jednu stavku da jedno domaćinstvo u MZ u kojoj funkcioniše vodovod u toku godine dana nije potrošilo ni jedan decilitar vode, po iskazanim prihodima, ništa drugo nismo gledali apsolutno. Šta mi ustvari radimo meni više nije jasno. Što se tiče MZ Stjepan Polje, svi ste upoznati, 2010.godine od kako smo stavili u funkciju, iskazali smo prihode 127.000 KM od potrošnje vode plus 6.500 novih priključaka. I sve to ide na žiro račun i odatle se vrši sve ostalo i da kažem da je bazen koštao 81.000 KM. Ide se svjesno, ulaže se u te stvari, a ono što se tiče prečistača, Stjepan Polje ne može uraditi prečistače, a za ostalo sredstva nama zbilja ne treba. Održiv je sistem. A sad kad pogledamo izvještaje koji su dostavljeni iz nekih mjesnih zajednica i da vidiš da je jedno domaćinstvo u toku godine dana nije potrošilo ni jedan decilitar, ne znam“.

Šehić Edin:

„Evo u odnosu na prošlogodišnji izvještaj koji je bio u sličnoj formi, ovaj zaista moram pohvaliti, jer dosta stvari možemo da vidimo, oko poteškoća koje je i Vahidin iznio i mislim da je njegova diskusija zaista na mjestu. Treba vodovod i kanalizacija da se postavi na drugačiji način na opštini Gračanica. Da pruži svoju stručnu pomoć, evo sad se možda može da razgovara o zaduženjima, sredstva zaista nedostaju i možda da se ide u neko kreditno zaduženje iduće godine i da se rješavaju ti problemi vodosnabdijevanja. Besmisleno je i ovo što Mirsad spominje Lendiće, da neki dijelovi nemaju pitku vodu. To je zaista besmisleno u dvadeset prvom vijeku. Tako da sigurno svi moramo biti više agilniji, odgovorniji. Slažem se i za ovo poštivanje što je kolega Puškar rekao, ali kako je, tako je, do sada smo tako radili, da pokušamo i dolazimo do tih zaključnih razmatranja koje je Nihad Sinanović dao u ovom Izvještaju. I moje pitanje direktno je. Da li će služba poduzeti po zaključnim razmatranjima da se jasno definišu rokovi. do kada MZ moraju uskladiti svoje vodovode sa Zakonom o vodama? vi ste i tabelarno naveli ta zaključna razmatranja, a mene interesuje kada će to biti implementirano? Dakle, interesuju me rokovi i do kad su mjesne zajednice dužne, te vodovode koji tako funkcionišu da rade u skladu sa kako sa Zakonom o vodama tako i o drugim pravilima i propisima? tako da bih zamolio ako može ili sada ili na narednoj sjednici da dobijem odgovor o nekoj planiranoj dinamici ovih zaključnih razmatranja koja su navedena u ovoj informaciji“

Hasić Ibrahim:

Nikad vode nije dosta, ne zaboravite. Ja bih evo, da prije svega, kažem, žalosno je što pojedine mjesne zajednice nemaju vode. Ja zaista ovo govorim od srca, a govorim evo i od predhodnog mandata kao i danas. Ja znam šta je imati, pa nemati, pa dođeš kod onog ko nema i može se znati kako je to. Krenuo bih samo Vahidinu vezano za projekat. Tačno je to da ti ne možeš bacati para po njivi, ili po šumi za neke puteve. Ja ako vam neću biti dosadan a nekim možda ne bi trebao biti dosadan odnosno oni koji su riješili to kao i ja, naravno Malešići, zajedno sa načelnikom. Dvije hiljadite godine sam ja sazvaio zbir od 700 duša, a mrtve glave su trebale da padaju zbog nestanka vode. Dolazilo je po šest, sedam cisterni vode, tad je načelnik bio Senahid Šaković, u Malešiće. Meni je projekat uradio Osman Čajić i nikad ne bih tražio boljeg, mada je Beridan bolji. Ali on projekte radi kabadahijski, ali je bolji i možda deset puta skuplji. Radio je i on nešto za Malešiće kao i za druge mjesne zajednice.

Projekat je uradio Osman gdje je po rednom domaćinstvu izašla cijena 415,00 KM da se uradi primarna i sekundarna mreža i to je urađeno vlastitim sredstvima, 460.000 KM, vlastitim ponavljam, vlastitim sredstvima. Samo je znači trebalo vode imali smo infrastrukturu da je možemo primiti. Pomanjkalo je vode, ali evo zahvaljujući i budžetu i građanima i na kraju krajeva načelniku koji je prihvatio inicijativu Babića i Malešića i našla se voda i došla je i ta voda, imali smo infrastrukturu i imali smo znači kud primiti vodu. Sad kad ima vode znači imaš je kud primiti. E sada, stručna osoba, ponavljam ja nikad ne bih tražio boljeg, jedino Beridana bi tražio kao boljeg, nekad ali ponavljam on je skup. A projekat koji je rješiv i koji nije skup, on je izuzetno dobar. Ovdje kad je u pitanju vodoistraživanje, evo kaže, kreditno zaduženje. Mi moramo jedno kazati, da mi nemamo ovdje stranke za iznalaženje i određivanje lokacije tamo gdje ćemo mi pronaći vodu. To se ponavlja ima sedam, deset godina, vi možda ne pratite, ja pratim igrom slučaja. Možda dvanaest bušotina je bilo jalovih od rata, na ovamo. Ali neko je određivao, neko je vršio studiju izvodljivosti. Ja sada pitam gdje su te vode, kud su otišle te pare. Vi znate na koga ja aludiram. To je prije svega direktor vodovoda. Navodno imamo javno preduzeće Vodovod, nemamo javnog preduzeća. Vodovod je privatna svojina još, kad će ovo biti, ja ne znam, trebalo bi da bude. Bušotine su rađene, a kako je ona skolobatana, ja imam običaj reći kao što kaže, skolobatao ko Šako jaciju. Tako je skolobatana i bušotina u Malešićima, koja je urađena kako je urađena, bilo je 0,00 litara kroz jednu sekundu. I tu se zatvara krug, pravi se izvještaj, izvještaj o istražnoj bušotini koji je debeo. Ništa tu nije urađeno. Krenula se raditi eksploataciona bušotina, čemu se radila. Da ne duljim, ja sam to govorio nekoliko puta i sada kreditno zaduženje. Kreditno zaduženje je najjeftinije, ali treba neko kazati gdje je voda. Nije samo dovoljno kreditno zaduženje, a vode nigdje a mi sredstva moramo vraćati. I evo ja sada zaista sve nas a i načelnika doduše on se bori koliko se on može izboriti, Lukavica, Škahovica, žalosno je da iz Škahovice voda ide u Gračanicu, a oni nemaju vode. Mislim to je zaista žalosno. U Lukavici je slučaj takav, kakav jeste, ne može da se nađe, ali naći će se vjerovatno rješenje i to treba raditi. Kad su Lendići u pitanju, ima vode u Lendićima garantujem da na 30 metara od tih domaćinstava imaju cjevovodi po dva cola, samo je tu neko drugo pitanje. Neki se sjećaju vijećnici, Puškar, Gadžić i dr. dok smo boravili u dershani, to je jedan od onih predsjednika Vijeća MZ koji je jutros bio ovdje, pa je bilo kukanje mjesec, godinu, tri godine, ljudi su meni dosadili. Kad god odu Fuadu ne može. I ja kažem dođite svi na Vijeće. Ja ovo moram kazati, nismo ni ušli u dershanu, Fuad im obećao i nakon deset dana priključili su vodu. Prema tome kad vodovod bude bio javno dobro na žalost sad nije, Fuad radi šta hoće. I eto neka radi šta hoće, ima valjda takve organe uprave. Hvala bogu ja ne zavisim od njega. Samo ću još jedno kazati. Dvije hiljadite sam platio da mi rade projekat od bunara do bazena, kad sam rekao da sam Čajića platio, da će mi on raditi projekat primarnih i sekundarnih, vratio mi pare sa računa, nisu mi htjeli uraditi projekat. To je to“.

Vijeće se nije izjašnjavalo o Informaciji u skladu sa Poslovníkom.

Sjednica je završena u 14,30 sati.

Nakon toga Predsjedavajući Vijeća je konstatovao da će se na temu Odluka o izmjenama i dopunama Statuta Općine, održati sjednica 07. 11. 2018. godine u 17,00 sati. Materijali su već dostavljeni.

ZAPISNIK VODILA
Mevlida Naimkadić

PREDSJEDAVAJUĆI
OPĆINSKOG VIJEĆA

Nihad Krajinović